

棗林外索目錄二集

曹操

銅雀臺

山陽公

疑塚

產異

曹操廟

陳琳

鵲巢非

詩調

鬱林石

妻甥女

龍州鄧艾廟

西山仙童

伯瑜

洛神

石人


王祥

管辰序兄輅傳

衛瓘璧玉

羊祜碑

蔡襲



鄧殷

劉伶

品官占田

蒿里

阮籍

洛陽舊火

稽康

李氏六龍

葛洪

韓壽

鍾離權

郭璞

博物志

綠珠

秦女休

桃葉歌

毛寶放龜

張翰秋風歌

梅頤增書

梁山伯

衛夫人

黃鵠

莫愁

王羲之墓

蘭亭

鳩摩羅什

謝安別墅

西戲馬臺

許真君

孫恩裔黨

桃源漁人

陶潛

柴桑令

慧遠

白蓮社

西夷上表

外孫記外祖遺事

沈慶之書

鮑照

井錦

水貢

州民

沈麟士抄書

玉兒王奴

鍾山壙名

昭明太子墓

餘暎

陶籍

後梁春秋

白鼠

白樓

後魏謠

後魏石像

地下受歲

劉晝

張滂

木蘭

晉末僭亂

前溪

中說元經

墨蹟

陳後王子

景陽井銘

鼓山神鉦

石經

佛圖戶

七聲

智者大師

白王

丁峴

隋隄

補隋忠臣

宗室世系

秦王山

牛口峪

高識傳

避諱

劉黑闥

薛仁果

入閣像

朝元閣

鑄錢郡字

直棘

龍毛

袁天綱題石

麻姑

諸陵

尉遲敬德城滁州

高宗論史

木葉遼陽

花黃果黃

章懷太子墓銘

李龍遷墓

狼山都督府

何仙姑

賂賓王

女論語

長生殿

太甲

武成閣

花鳥使

季如暹

滕王元嬰

追貶楊素

梵勅

一行

玄宗見道

天子別號

戒牧宰碑

宗璟薦鄭勉

鳳爪傷龍

張萬歲王毛仲

亢倉子

楊貴妃

聽鴻鷄聲

公主入道

張九齡

天寶迴文詩

安祿山反兆

卑坑

李林甫詩

王維

端正樹

金帶補

內臣妻

讓國于弟

南霽雲

于休烈

孝經

佛經

春秋

寒食

卹郭夢

八閩齋會石幢

韋應物

元結

杜甫詩義

花卿

王母鳥

小寒食

李伯禽

蔡泌

私白

僧懷濬

韓家莊

大顛

韓木

退之像

茶仙

綠野堂

陽城驛

孫樵家僮

白雪樓五客

釋道英

董召南故里

賈島

吐蕃

石經

門埃

偽書

甲門

度外星辰

錢塘公館詩

六詔

星命

執革卦影

崔鶯二

薛濤井

唐曾因墓志銘

陷虜子孫

呂岩

東都九老會

麒麟草

旱藕

石孝忠

舉直禪師

申包胥廟誤

聖未

普聞禪師

林慎思續孟子

羅隱

奚冠耳面

楊筠松

皮日休

香奩集託名

孤魂及第

軋陵

塚鬼上書

朱藻葆光

通腸未

如京使

康王重瞳

契丹辨璽

孫印

內黃

李崇礼

王審知

王延鈞母家

劉隱祖

吳越改元

吳越備史

吳越貢道

南唐程式

南唐劉仁瞻像

孟賓

胡嶠陷虜訖

喬元陸軌

宗初藏書

柴世宗二子

孟果男

樊若水

王彥昇餒死

宗制

留鎮賜第

曹彬殺鍾情

改姓

水灌太原

土司世姓

定七夕

戟門

鄉墨

王禹偁與馮伉書

李煜被禍

記殘經

輕賦

異獸

楊繼業

手單

官尼

制科

梁灝

王昭遠

玉等子

卿舉

古成子

腹兄

呂蒙正土室

三至堂

天子門生

同名丁謂

葉武

寇準柘枝舞

棗林外索

曹操

曹操有發丘中郎摸金校尉二官

南齊廢帝子業亦置之領於建安王休仁山陽王休祐

魏武短歌行何以銷憂惟有杜康註康字仲寧

銅雀臺

銅雀臺鄴城西北北則冰井臺南則金鳳臺三臺相去各六十

鹽官談遷



里後樓土室俱燬土人掘地得瓦色頗青內平瑩印工人姓名皆八
分隸書研譜云人得此瓦為研貯水數日不污鄴中記曰此齊
起鄴南城屋瓦皆以胡桃油之光明不癬筒瓦用在覆故油其
背版瓦用在仰故油其面筒瓦長二尺濶一尺版瓦之長如之
而其濶 今得其真者當油處必有細紋俗曰琴紋有白花
曰錫花傳言當時以黃丹鉛錫和泥積歲久而錫花乃見古磚
大者方四尺上有盤花鳥獸紋千秋萬歲字其紀年非天寶則
興和蓋東魏北齊也又磚有筒者花紋年號如磚內貞外方承簷
溜亦可為硯鄴人有言曰銅雀瓦硯體質細潤而堅如石不費
筆而發墨此古所重者而今絕無蓋魏去今千有餘年村夫剖
土求之聚衆踰年不得鄴民乃偽造以詒遠方王安石詩曰吹
盡西陵歌舞塵當時屋瓦始稱珍甄陶往往成今手尚託虛名
動世人宋刺史李琮嘗言元豐初於丹陽卽不疑家得唐丙申
歲元次山家藏鄴城古磚背有花紋及萬歲字與鄴中記合又
曰大觀興和二年造則唐賢所珍已出於南矣唐丙申乃天寶
末年至琮時二百餘載而硯可用如新偽瓦之質燥用之不能

久大力勝也夫甄陶之物土以為質水以和之必得火而成火力方勝則土暎而水絕雖有黃丹鉛錫焉能潤澤哉惟古瓦與磚沒地中數百年感霜露風雨之潤既久火力已絕復受水氣所以含蓄潤澤而資水發墨也 臨漳縣志

山陽公

魏奉漢獻帝為山陽公居濁鹿城在今懷慶修武縣西北六十里一名山陽城帝後葬城北人呼漢陵今以名村

疑塚

臨漳縣西十五里滏陽講武城外凡七十二處森然彌望高者如小山布列直至磁州而止俗曰曹氏疑塚唐蕭冰屋詩安排死去千家塚刻畫生前一片心安得此心如此塚不教人識到於今俞應符詩二首生前欺天絕藻統死後欺人設疑塚人生用智死即休何用餘機到丘壠人言疑塚我不疑我有一法君未知盡發七十二疑塚必有一塚藏君屍劉溫詩生前詐力蓋中州死後何疑七十丘他日鼎分重禪繼也須認取漢春秋彭剛詩二章金棺何處葬奸欺銅雀臺中直夜思不作子孫長父

履塚下脫香分字

許空教百里塚累累西陵千載有餘哀禾黍黃時詔正來明日
邯鄲城下過分留殘泪吊叢臺宗王安石詩青山如浪入漳州
銅雀臺西八九丘螻蟻往還空隴畝麒麟埋沒幾春秋京鏜詩
疑塚多留七十餘謀身自謂永亡虞不知三馬同槽夢曾為見
孫遠慮無孫鎡詩曹瞞疑塚七十二未必遺骸在此間生自疑
人疑不 還留疑跡後人看焦維章詩履塚 不計春妓魂
曹鬼已成塵就中只有漳河在風浪於今愁殺人 曹操塋鄴
城西北曰西隄即高平隄也

魏崔銑彰德府志曰磁州漳河南北塚累累不絕大小殊狀俗
曰曹氏疑塚往者歲荒民盜發塚皆有屍其一為齊高陽王湜
墓志見存

郡人教諭劉瑄曰疑塚之說載在志籍今古一律不辨其偽誠
以訛傳訛胥墮阿瞞計中而不自知其非也瑄生斯地為斯民
也一得之愚耿耿不昧已非一日茲將就正於有道可乎慨自
嘉靖八年饑饉太甚窮民發墓以就口實州南諸塚掘發殆盡
其間志石皆北齊高歡皇帝并宗室塚墓申省祭家尚有志刻

一張曰王諱湜字頊達齊王第十三子也王既為齊則塚不可
疑一也西陳村迤西四塚俗曰四牧塚其實齊王之四妹塚也
妹既為齊則塚不當疑二也三里堡南大路西側塚前碑石題
曰公主夫額以公主則塚不必疑三也州之西側大塚俗人呼
曰天子塚實則齊王陵也夫塚為齊王則塚不待疑四也然則
古今胥疑而不能白者一則失於無證而輕於信二則狃於見
聞而其明三則老瞞之奸踪跡詭秘而難於知也蓋操嘗發
梁孝王塚破棺收金其心不正故於已事而過為之防其藏匿
譎秘必有人所不知者也觀其遺命之宮人歌舞銅雀臺上以
望吾陵則其言之誠偽屍之在亡未可諒也是則不知屍之所
在固為不疑塚之七十有二果可疑乎否乎按南史高陽康
穆王湜神武第十一子也其第十三子為華山王湜今志石稱
齊王第十三子可訂史之誤

產異

魏景初元年衛國李善家燕生巨鷲若鶯高堂生曰此魏室之
大異防鷹揚之臣于蕭牆之內其後宣帝起遂有魏室按戰國

策宋康王之時有雀生醜貙於城之陬使史占之曰小而生巨必伯天下康王大喜於是滅滕伐薛取淮北之地欲伯之速成故射天笞地斬社稷而焚滅見伐于齊國云

曹操廟

唐申屠子迪毀夷陵曹操廟

陳琳

陳孔璋居袁裁書則呼操為豺狼在魏製檄則目紹為虺蛇在時君所命不得自專然亦文人之巨患也當務從容消息之顏

氏家訓

鵲巢非利

魏文帝景初元年凌霄闕始構鵲巢其上帝以問高堂隆對曰詩云維鵲有巢維鳩居之今興起宮室而鵲來巢此宮室未成身不得居之象也於是帝改容動色

萬曆中平湖陸太宰光祚於卜宅始立梁巢鵲太宰聞之

不憚引詩為券後果如其言

詩調

劉公幹贈五官中郎將詩昔我從元后整駕至南鄉過彼豐沛
都與君共翱翔元后蓋稱曹操也至南鄉謂伐劉表之時豐沛
都喻操譙郡也王仲宣從軍詩云籌策運帷幄一由我聖君聖
君亦稱曹操也又曰竊慕負鼎翁願厲朽鈍姿是欲效伊尹負
鼎於湯以伐桀也是時漢帝尚存而二子之言如此一曰元后
一曰聖君正與荀彧比曹操為高光同科或以公幹平視美人
為不屈是不為知人之論嚴滄浪詩話

鬱林石

吳鬱林太守陸績泛海歸吳舟輕恐覆取巨石為裝績家吳郡
婁門內臨頓里之北石至今存弘治丙辰四月巡按樊社移於
公署曰廉石亭

妻甥女

孫休朱夫人朱據女休姊公主所生休妻其甥事同襟惠

龍州鄧艾廟

龍州宣撫司東一百七十里有魏將軍鄧艾廟以伐蜀嘗經此
宋知州洪咨夔毀其廟更祀諸葛告其民曰毋事仇讐而忘母

陰平道在陝西守禦軍民千戶所

西山僊童

周末隆慮人喬順二子曰璋曰瑞師事仙人盧子綦於隆慮山棲霞谷教以清冷之術服飛龍藥十年不飢與師白日飛舉故魏文詩曰西山何其高高上無極上有西仙童不飲亦不食

伯瑜

陳思王靈芝篇伯瑜年七十綵衣以娛親今人但知老萊子之事而不知伯瑜困學記聞

洛神

晉江黃鳳翔曰洛神賦非感甄也寃哉陳思處於危疑顛沛之會故感甄也天問曰胡羿射夫河伯而妻被洛濱遠遊賦曰騰告鳶鳥迎宓妃植自附屈原而不敢顯語託宋玉也

石人

魏築千秋塢五龍渠立一石人若腹若東西脇皆有記某略曰後當興工宜就西磧故書之於右以遺後賢古人不忍輕毀故渠并不欲掩作者之姓名蓋如此陳繼儒太平清話

王祥

諸城縣孝子灣亘四五里清瑩不涸嚴冬冰合惟中央二三尺不冰相傳王祥卧冰處上有祠晉書王祥臨沂人今沂州王祥河一曰孝河州北二十五里有孝塚塚西咸溝湖孝感泉安慶府望江縣南二里卧冰池祥嘗自臨沂扶母避地於此人慕而名之然雖極凍其中有人卧形

郝經續後漢書以王祥為篡臣

管辰序兄輅傳裴松之三國注

按辰所稱鄉里劉太常者謂劉實也辰撰輅傳實時為太常穎川則實弟智也實智並以儒學為名無能言之世語稱實博辨猶不足以並裴何之流也又按輅自說云本命在寅則建安十五年生也至正始九年應三十九而傳云三十六以正元三年卒應四十七傳云四十八皆為不相應也近有閻續伯者名續該微通物有良史風為天下補綴遺脫敢以所聞列於篇左皆從受之於大人先詰足以取信者冀免虛誣之說云爾嘗受辰傳所謂劉太常者曰輅始見聞由於為隣婦卜亡牛云當在西

面窮牆中縣頭上向教婦人令視諸丘冢中果得牛婦人目以
為藏已牛告官按驗乃知以術知故裴冀州遂聞焉又云路中
小人失妻者輅為卜教使明旦於東陽城門中伺擔豚人牽與
共聞其如其言豚逸走即共追之豚入人舍突破主人甕婦從
甕中出劉侯曰此類甚多辰所載纔十一二耳劉侯云辰孝廉
才也中書令史記云龍輅鄉里人云輅在田舍嘗候遠隣主人
患教失火輅卜教使明日於南陌上伺當有一角中諸生駕牛
故車必引留為設賓至此能消之即從輅戒諸生有急求去不
聽遂留當宿意大不安以為圖已主人罷入生乃把刀出門倚
西薪積間側立假寤歛有一水小物直來過前如獸手中持火
以口吹之生舉刀驚斫正斷腰視之則狐自此主人不復有灾
前長廣太守陳承祐口授城門校尉華長駿語云昔其父為清
河太守時石輅作吏駿與少小後與鄉里遂以恩意常與同載
周旋具知其事云諸要驗三倍於傳辰既短才又年縣小又多
在田舍故益不詳辰仕官至州主簿部從事太康之後物故駿
又云輅亦卜不志中十得七八駿問其故輅云理無差錯來卜

者或言不足以宣事實故使爾華城門夫人者魏故司空涿郡
盧公女也得疾連年不差華家時居西城下南隄里中三廐在
其東南輅卜當有師從東方來自言能治便聽使之必得其力
後亡何有南在廐駒當克甲卒來詣盧公占能治女郎公即表
請留之專使其子將詣華氏療疾初用散藥後復用丸治尋有
效即奏除駒名以補太醫又云隨輅父在利漕待有治下屯民
捕鹿者其晨行還見毛血人取鹿教來詣廐告輅輅為卦語云
此有盜者是汝東巷中第三家也汝徑往門前伺人無時取一
瓦子密發其確屋東頭第七椽以瓦著下不過明日食時自送
還汝其夜盜者父病頭痛壯熱煩疼然亦來詣輅卜輅發為案
盜者具服輅令搗皮肉藏還著故處病當自愈乃密教鹿主往
取又語使復往如前棄瓦舉椽盜父亦差又都尉治內史有失
物者輅使明晨於寺門外看當逢一人便指天畫地舉手四向
自當得之暮果獲於故處矣

衛瑾璧玉

魏咸熙初將軍衛瑾至成都得璧玉印各一枚文似成信向充

聞之曰吾聞譙周言先主諱備其訓具也後主諱禪其訓授也
今中撫軍名炎興之兆乎

羊祜碑

羊祜墮泪碑益州記捷為李暘撰暘密之子

蔡襲

景獻羊皇后蔡邕甥女也羊祜亦邕外甥孫景獻皇后同產弟
祜禦吳功將進爵乞以賜舅子蔡襲詔封襲關內侯

鄧殷

鄧攸孫殷鍾會伐蜀召為主簿終中庶子

劉伶

中說劉伶作劉靈

品官占田

晉平吳後制品官占田之法第一品占五十頃第二品四十五
頃第三品四十頃第四品三十五頃第五品三十頃第六品二
十五頃第七品二十頃第八品十五頃第九品十頃又各以品
之高卑廢其親屬

蒿里

陸機太山吟蒿里立有亭幽岑迤萬鬼人死其魂拘于蒿里岑
參詩東嶽前後魂北邙新舊骨 華亭黃耳寺以犬得名詩話
謂黃耳非犬也乃童僕名其捷足如犬

阮籍

京師曹氏家藏阮步兵詩一卷唐人所書與世所傳有數十首
集中所無其一篇云放心懷寸陰羲和將欲冥杖撫長劍仰揮
視浮雲行雲間有立鵠抗首揚哀聲一飛冲青天疆世不再鳴
安於鷄鷄徒翩翩戲中庭又云嘉禾木下成蹊東園捐棗李秋
風吹飛藿零落從此始繁 有樵悴堂上有剗杞驅馬舍之去
去上西山趾一身不自保况復戀妻子凝霜被野草歲暮云
已詩話皆類此非後人作矣孔宗翰亦有本與此多同詩紀

洛陽舊火

元帝渡江洛陽人王離妻李氏將洛陽舊火南渡自言受道祖
母王氏傳此火并有遺書二十七卷臨終使行此火勿令斷絕
火色甚赤異於四方病者將此火煮藥及灸諸君皆愈轉相妖

繫下當是華字

感官司禁不能止及李氏平火亦滅人號其居曰聖火巷按古者五時取火五木以改火使民不疾洛陽之火必出於异木自能蠲疴非必妖惑也馮時可集

· 嵇康

裴松之曰按本傳云康以景元中坐事誅而干寶孫寶習鑿齒諸書皆云正元二年司馬文王反自樂嘉殺嵇康呂安蓋緣世語云康欲舉兵應毋丘儉故謂破儉便應殺康也其實不然山濤為選官欲舉康自代康書告絕事之明審者也按濤行狀濤始以景元二年除吏部郎耳景元與正元相去七八年以濤行狀檢之如本傳為審又鍾會傳亦云會作司隸校尉時詳會作司隸景元中也

嵇康無鬼論 唐莆田林披茂則以明經擢第授臨汀郡曹掾郡多山鬼淫祠披著無鬼論曉民

· 李氏六龍

李密令伯六子皆英雄秀逸號六龍

葛洪

葛洪嘗拜伏波將軍見莊綽辨疑

韓壽

陳騫以韓壽為掾每會聞有异香香乃外國所貢騫計武帝惟賜已嫌壽與女通乃以女妻壽郭子謂賈充女者訛也

鍾離權

大將軍周處西征鍾離權充偏將軍處戰亡兵潰權隱山學道以仙名焉神仙通鑑

郭璞

嘉定州烏龍山下傳晉郭璞注爾雅於山有爾雅臺注成洗硯於江江魚吞之盡黑至今稱黑頭魚每年春日魚出清明日止其味甚佳

博物志

張華博物志唐人殷文圭云華原書四百卷晉武帝刪為十卷

綠珠

綠珠梧州博白縣西雙角山下梁氏女梁氏之居舊井存焉汲飲者必誕美女里閭以為亡益遂鎮以巨石太平廣記

秦女休

左延年秦女休行記時事也女休年十四五為燕王婦為宗報仇殺人都市竟以赦宥得免

桃葉歌

桃葉王猷之愛妾也其妹曰桃根詞曰桃葉復桃葉雋葉連桃根

毛寶放龜

搜神記載豫州刺史毛寶戍邾城有一軍人於武昌市見人賣一白龜子長四五尺潔白可愛便買取持歸著甕中養之漸大至尺許軍人憐之持放江中後石季龍攻邾城毛寶棄豫州既赴江舟皆沉溺軍人亦墮水覺在一石上水裁至腰須臾浮出中流視之乃是先所養白龜可六七尺送至東岸出頭視此人徐游而去幽冥錄載亦同乃白氏六帖引搜神記直以為寶放龜而合璧諸書俱相承爾雅翼以毛寶過江白龜載之而度為異皆訛也晉書本傳邾城之役毛寶溺死庾亮痛哭發疾遂薨王隱晉書曰邾城陷寶屍沉江不出戴祥移告河伯諸神使出

實屍十餘日乃出則知搜神記所言事繫軍人為不夷藝海洞酌

張翰秋風歌

秋風起兮佳景時吳江水兮鱸魚肥三千里外家未歸恨難得

分仰天悲

梅願增書

元帝時豫章內史梅願增伏生書二十五篇原二十八篇

梁山伯

梁山伯字處仁家會稽游學道逢祝氏子同往肄學三年祝先

返後二年山伯方歸訪之上虞始知祝女子也名英臺山伯帳

然歸告父母求姻而祝氏已許鄒城馬氏弗遂山伯後為鄞令

死塋鄒城西清道原明年祝適馬氏過其墓風濤不能前英臺

聞有山伯墓臨塚哀慟地裂而埋璧馬事聞於朝丞相謝安奏

封義婦塚寧波府志

鄞縣東十六里接待寺西祀梁山伯號忠義王廟

衛夫人

衛夫人名鑠字茂漪晉汝陰太守李矩妻善鍾法能正書入妙

王逸少師之翰墨誌

黃鵠

石虎時揚州獻黃鵠鵠五頭長一丈聲聞十里許泛於玄武苑中玄武池化為玄龜水經

莫愁

莫愁石城女子非石頭城也石城在古復州郢中今之承天府是也且與襄陽估客同為一事五雜俎

王羲之

大城縣城西五里餘王相村古墓屋民竊啟見五色石柳上有王羲之字速掩之

蘭亭

唐何延之記蘭亭四十有一人內有支道林宋李龍眠作圖除去亦不損前數又不知今所增一人為誰也顧璘息園存稿

鳩摩羅什

鳩摩羅什但能精通術數傳極群書僧中之子雲茂先也謂之成佛作祖吾則未敢什父羅炎修行不遂為禁鬱所逼已墮落

矣至什而復蹈其轍焉雖曰彼逼亦由欲障未除升座講經之際二兒登肩神識未定鬼瞰之矣既生二子何患法種亡嗣妓女十人之畜不亦可以已乎臨終之時誦神呪自救未及致力轉覺危殆其處死生之際非能脫然無罣碍者尚在安佛園澄之後乎謝肇淅

謝安別墅

褚叔度請謝安別墅為寺

西戲馬臺

劉澄之山川古今志彭城西南有戲馬臺劉裕九日所登水經注石帀每講武于漳水上即升臺以望之

許真君

神仙之跡未有如許氏之盛而亦未有如許氏之不相蒙者陶貞白極重真誥真誥稱許穆與兄揆次兄帀牙子玉斧門客楊義俱為仙官而義穆最貴中有許邁與穆二書貞白所著許長史碑穆世名謚仕至護軍長史散騎常侍得道卒年七十二揆世名毗帀牙名聯皆得道又云第四兄字遠游永和四年嘉遁

不返然不言得道。晉書許邁傳字叔玄，一名快，句容人。後云玄字遠游，與王右軍善，遊名山不知所終。好道者謂之羽化。然不為謚作傳，亦不及其仙事。而今世所崇奉許真君者，名遜，據列仙傳為遠游弟，嘗與郭景純俱叅王敦軍，切諫。景純兵解而真君隱去，以陰功重，仙品最高，為九天採訪使。真誥又略不及晉史。既非隱書，真誥亦非真文。貞白與真君俱赫然朗著，何以不相及也。右軍有元度腫至一帖，黃長睿揚用修遂引以駁晉史。謂元度寔病死，乃云服巨勝仙去，不知玄度乃許詢，非邁也。續

晉陽秋曰：詢字玄度，高陽人，風情簡素，辟司徒掾，不就。早卒。世說盛稱之。晉史不為詢作傳，僅附孫綽傳，亦無服巨勝語。此皆不可曉者。按史以載事，仙釋出世，業在事外，非可以示民。故以佛圖澄羅什之神僧，而僅列之於藝術。况羽化尸解，茫昧難徵者乎。晉書之詳許氏也，奚啻真誥。雖曰真文，然所志神仙官職，太涉于有似巫覡之談矣。胡可據以為寔際。王世貞危言

許真君傳，晉書不載其仙跡甚著。初生南昌，母夫人夢金鳳啣珠墜掌中。既長，博學多通，聞西安吳猛，得至人丁義神方，乃師

之太康元年為西蜀旌陽令治行甚著以世亂弃官歸邑民隨至宅改氏族以從者甚衆號許家營焉與吳猛游高陽聞丹陽黃堂靖有女師謚姆多道術同往叩姆曰昔孝弟王自上清降曲阜蘭公家謂蘭曰後晋代當有許遜傳吾道留金丹寶經與我俟子有年遂擇日設壇授之謂吳猛君當反師許也姆曰取香茅一根南向擲曰子歸認茅路處立吾祠歲秋可一至二君還得飛茅迹於所居南四十里已叢生矣乃建黃堂祠真君渡小蜀江抵肆主人朱氏貧而甚恭真君畫一松于壁其家遂倍得利後江漲潰隄布舍俱漂惟松壁不壞嘗云吾仙去後一千二百四十年間豫章之境五陵之內當此地仙八百江心忽生沙洲掩過沙井其時也真君弟子數百志趣不一乃化炭為美婦人試之不染污者惟十人爾真君歸郡有美少年通謁既去謂弟子茲非人老蛟精也迹其所之遽化黃牛臨郡城沙磧上真君剪紙化黑牛往闕令施岑持劍俟其闕酣揮之中其左股牛奔城南井中復化為人初蛟慕賈玉女化少年入賈玉家玉大愛其才回贅為婿居數歲生二子常以春夏獨出若營賈者

至秋重載歸，寶貨充溢，蓋覆舟所獲也。是秋徙還，詒玉云：為盜傷左股，玉歎惋求醫，真君乃為醫，謁玉，玉喜，召其婿，蛟精懼，遂匿。真君隨至其堂，厲聲叱之，乃見本形，蜿蜒堂下。二子皆為小蛟，併斬之。賈女亦幾變形，真君給以真符，乃免。謂玉曰：蛟精所居下皆洪波也，亟遷高原，其宅不日陷為澤。真君復還豫章，曰：此地蛟螭所穴，須鎮之，乃於牙城南鑄鐵為柱，出井外數尺，下施八索，鈎鎖地脉。祝之曰：鐵柱若亞，其妖再興，吾當復出。鐵柱若正，其妖永除。由是屏跡。王敦舉兵內向，真君同吳猛往說止之。敦怒，真君乃乘杯擲起，化為白鶴。敦方舉目，已失二君所在。至孝武寧康二年甲戌八月朔日，上昇。年一百三十六歲，嘗謂星下散為物，人上昇為仙，一氣推移，不足為怪。即道家所藏真君昇舉事，抑何叠叠。至其教人，惟以忠孝廉謹寬裕容忍為八寶，與吾道何殊。記曰：清明在躬，志氣如神。天降時雨，山川出雲。人心湛然，無滓。即太虛亦為復何遠。豈必談鉛設汞，吾讀真君有悟，目錄其最异者。又道家載旌陽得道後，帝贈其遠祖許由、玉虛僕射、曾祖琰、太微兵衛大夫、祖玉、太極把業錄籍典者。父

肅中岳仙官嗟乎武仲逃堯後復有此贈未未知復逃避否此
拔宅事恐盡出附會未可遽以為實也馮時可藝海涸酌

許旌陽問道于女師謚母母曰一念不欺為忠一事不苟為孝

孫恩裔黨

晉末妖賊孫恩作亂於會稽宋高祖劉裕為司馬討敗之恩於
臨海投水死眾推恩妹夫盧循為主後劉裕破循于東陽循奔
永嘉復追破之追討至晉安循浮海南走晉末雖滅遺種逃匿
叛散居山海厥類尚繁唐武德八年都督王義童遣使招撫得
其首領周造麥細陵等並授騎都尉令相統攝不為寇盜貞觀
十年始輸半課其居止常在船上兼結廬海畔隨時移徙不常
船後尾共高當中平濶衝波逆浪都無畏懼名了鳥船閩書
寰宇風俗記泉卽卽此州戶夷亦曰游艇子

桃源漁人

桃源漁人姓黃名道真

陶潛

陶潛潯陽柴桑人柴桑今德化縣之楚城鄉也楚城鄉西南八

十里正德九年提學副使李夢陽得斷碑曰晉陶靖節先生故里始得其墓而陽山上京粟里西廬等處相去直三十里有作陶淵明詩跋尾者者言淵明讀山海經詩形夭無千歲猛固有在竟莫曉其意後讀山海經刑天獸名也好銜干戚而舞乃知五字皆錯形夭是刑天無千歲是舞干戚耳傳者誤謬如此不可不察也竹坡詩話

陶潛不仕宋所著詩文俱書甲子韓偓不仕梁所著詩文亦書甲子偓節行如潛而詩綺靡蓋所養不及耳薛西原曰立節行易養性情難謝榛

柴桑令

劉遺民曾為柴桑令非陶淵明也

外孫記外祖遺事

外孫記外祖遺事者陶淵明蘇子瞻朱元晦元俞好問

慧遠

耶舍與遠公會嘗舉如意無言以示遠遠不悟即拂衣去徑上紫霄峰是時禪學未入中國而兆則見於此矣王禕廬山記

白蓮社

廬山蓮社十八賢。慧遠法師姓賈氏。鴈門樓煩人。慧永姓繁氏。河內人。慧持遠公弟也。與兄同事道安。道生魏氏。巨野人。姓也。客居彭城。佛陀耶舍尊者。罽賓國娑羅門種。佛陀跋陀羅尊者。甘露飯王之裔。慧叡冀州人。曇順黃人。道教瑯琊王氏。隨祖凝之。字江州。曇恒河東人。曇昺姓陳氏。潁川人。曇詵廣陵人。劉民名程之。字仲思。彭城聚里人。漢楚元王之後。雷次宗字仲倫。南昌人。宗炳字少文。南陽人。官任太子舍人。張野字萊民。官任

治中。張銓字秀碩。張野族。周續之字道祖。鴈門廣武人。

慧遠年八十四。晉義熙十三年秋八月六日。見謝靈運詠序。

王禕曰。慧遠卒於晉義熙十二年丙辰。年八十三。陸修靜沒於

宋元徽五年丙辰。年七十二。丙辰相去六十載。推而上之。修靜

生晉義熙四年丁未。慧遠亡時。修靜才十歲耳。至宋元嘉末。修

靜始來廬山。時遠公已且三十年。靖節死亦二十餘年。安取所

謂三笑乎。或曰。晉蓋有兩修靜也。宗濂跋匡廬社圖十八賢道

士陸修靜。法師慧遠。陶元亮。畢穎之。遠公弟慧持。僧跋陀。宗少

文僧曇順、劉程之、雷仲倫、周道祖、餘忘之、劉程之、蓮社文云、歲在珥提格七月戊辰朔二十八日乙未、慧遠命正信之士、豫章次宗等百有二十三人、集於廬山般若臺精舍、修西方淨土之學、今所畫止十八人、取著名于時者也。

西夷上表

常勝天子陛下諸佛世尊常樂安隱三達六通為世間道是名如來應供正覺遺形舍利造諸塔像莊嚴國土如須彌山村邑聚落次第羅匝城郭館宇如忉利天宮宮殿高廣樓閣莊嚴四

兵俱足能伏怨敵國王豐樂無諸患難奉承先生正法治化人民良善慶無不利處雪山陰雪水流注百川洋溢八味清淨周匝屈曲順趨大海一切衆生咸得受用於國諸土殊勝第一是名震旦大宋揚都承嗣常勝大王之業德合天心仁廡四海聖智周備化無不順雖人是天護世降生功寶藏大悲救世為德我尊主常勝天子是故至誠五体敬禮呵羅單國王毗沙跋摩稽首問訊宋文帝元嘉十年

大吉天子足下離淫怒癡哀愍群生想好具足天龍神等恭敬

供養世尊威德身光明照如水中月如日初 間自蒙普照十方其白如雪亦如月光清淨如華顏色光耀威儀殊勝諸天龍神之所恭敬以正法寶梵行衆僧莊嚴國王人民熾盛安隱快樂城閣高峻如乾他山衆多勇士守護此城閣莊嚴道巷平正著種種衣猶如天服于一切國為最殊勝吉揚州城無憂天主愍念群生安樂民人律儀清淨慈化深廣正法治化供養三寶名稱遠至一切並聞民人樂見如月初生辟如梵王世界之主一切人天恭敬作禮呵羅單跋摩以頂礼足猶如現前以體布地如殿陛道供養恭敬如奉世尊以頂着地曲躬問訊忝承先業嘉慶無量忽為惡子所見爭奪遂失本國今惟一心歸誠天子以自存命今遣毗紉問訊大家意欲自往歸誠宣訴復畏大海波風不達今命得存亦由毗紉此人忠志其恩難報此是大家國今為惡子所奪而見驅擯意頗忿惋規欲雷復伏願大家聽毗紉買諸鎧仗袍襖及馬願為料理毗紉使得時還前遣閣邪仙婆羅呵蒙大家原賜悉惡子奪去啟大家使知今奉薄獻願垂納受元嘉十三年

宋國大王大吉天子足下敬禮一切種智安隱天人師降伏四
魔成等正覺轉正尊法輪度脫衆生教化已周入于涅槃舍利
流布起無量塔衆寶莊嚴如須弥山經法流布如日照明無量
淨僧猶如列宿國界廣大民人衆多宮殿城郭如忉利天宮名
大宋揚州大國大吉天子安處其中紹繼先聖王有四海關浮
提內莫不來服志以茲水普飲一切我雖在遠亦霑靈潤是以
雖隔巨海常遙臣屬願照至誠垂哀納受若蒙聽許當年遣信
若有所須惟命是猷伏願信受不生异想今遣使至佛大陀婆

副使葛抵奉宣微誠稽首敬禮大吉天子足下陀婆所啟願見
信受諸有所請惟願賜聽今奉微物以表微心

王師黎婆達
陀阿羅跋摩

元嘉十二年
閏婆：達國

伏聞彼國據江傍海山川周固衆妙悉備莊嚴清淨猶如化城
宮殿莊嚴街巷平坦人民充滿歡娛安樂聖王出游四海隨從
聖明仁愛不害衆生萬邦歸仰國富如海國中衆生奉順正法
文王仁聖化之以道慈施衆生無所遺惜帝修淨戒軌道不及
無上法船濟諸沉溺群僚百官受樂無怨諸天擁護萬神侍衛

天魔降伏莫不歸化王身莊嚴如日初出仁澤普潤猶如大雪
聖賢承業如日月天於彼莫丹寂為殊勝臣之所住名迦毗河
東際于海其城四邊志紫紺石首羅天護令園安隱國王相承
未嘗斷絕國中人民率皆修善諸國來集共遵道法諸寺舍中
皆七寶形像衆妙供具如先王法臣自修檢不犯道禁臣名月
棄世王種惟願大王聖體和善群臣百官悉自安隱今以此國
群臣吏民山川珍寶一切歸屬五體投誠大王足下山海遐隔
無由朝覲宗仰之至遣使下承使主父名天魔志達使主名尼

陀達此人由來良善志信是故今遣奉使表誠大王若有所頒
珍奇異物志當奉送此之境土便是王國王之法今治國善道
志當承用願二國信使往來不絕此反使還願賜一使其宣聖
命備勅所宜款至之誠望不空反所白如是願加哀愍奉獻金

剛指銀摩勒金鏤諸寶物赤白鸚鵡各一頭

元嘉五年天竺
迦毗國王月爰

右諸表俱文帝元嘉間頗似梵夾蓋涵濡象教語輒相類隋唐
以來漸被華風譯使紛沓遂隔前製又趙宋元豐四年于闐國
上表稱于闐國倭天福力量知文法黑汗王書與東方日出大

世界田地主漢家阿舅大官家政和年進玉表云日出東方
赫赫大光照見西方五百里國五百里國內條貫主黑汗玉表
上日出東方赫赫大光照見四天下四天下條貫主阿舅大官
家其可笑如此

沈慶之書

南宗沈慶之與兄書登北邙遠眺衆美都盡光武坟邊杏甚美
今送其核

橋去洛陽宮六七里悉用大石下負以通水可受大船過也制
作奇狀洛水道路本好青槐映蔭可賞

千金隄舊堰穀水魏時更修謂之千金塢

陸雲臺上有幽井望之幽然投一石子擲之久方聞聲

石徑大都其碑高丈一許廣四尺駢羅相接

鮑照

宋子京筆記云今人多悞鮑照為鮑照李商隱有詩云濃烹鮑
照葵又金陵人得地中石刻作鮑照字潘子真詩話云景文殊
不知武后時諱照唐人因以昭名之事具昭祠堂記

井錦

南齊時荊州城東天子井出錦於時士女取用與常錦不異經月乃歇吳均齊春秋

齊梁紀錄並云出自蕭何又編御史大夫望之以為先祖之次按何望之於漢俱為勲德而望之本傳不有此陳齊典所書便乘實錄近秘書監顏師古博攷經籍注解漢書正其非今隨而改削云

水貢

湘鄉縣內薊泉井氣如椒蘭釀酒殊勝若合以他水則變南齊時有水貢民以為病罷之立浮屠其上

州民

孔稚圭答蕭司徒書其一云十一月二十九日州民御史中丞孔稚圭啟云州民即今治生也

沈麟士抄書

武康沈麟士好學織簾有書數千卷燬於火時年踰八十手自抄寫火下細書復成三千卷

玉兒玉奴

潘淑妃名玉兒唐楊貴妃名玉奴蘇子瞻詩玉奴終不負東昏

鍾山壙銘

梁任昉大同四年七月於鍾山壙中得銘曰龜言土著言水甸服黃鍾啟靈址瘞在三上庚墮遇七十已六千三百浹辰交二九重三四百圮當時莫能辨者昉之五世孫升之以授鄭欽說乃悟卜宅者庚葬之歲月日辰而識其墓地殆無一字閑設又毫厘不差也沈作詰寓簡

昭明太子墓

昭明太子塋池州秀山門外銅陵天啟乙丑五月貴池孝夢韓君理夢告以侵地辛未赴銅陵教諭又屬夢遂復之

餘暎

梁元帝纂要云日在午曰亭在未曰映王仲宣詩山岡有餘映謂日仄也譚苑醍醐

陶籍

陶弘景子籍善詩為錢塘令政化如神

後梁春秋

江陵蔡允恭著後梁春秋十卷

明海鹽姚士彝著後梁春秋

白鼠

北魏宣武帝洛陽縣獲白鼠散騎常侍兼尚書盧昶按瑞典外鎮刺史二千石令長不祇上命刻暴百姓人民怨嗟則白鼠至因上表諫

白樓

朔州舊城內東北白樓郡志云後魏納後秦姚興之女建此望故國飾以鉛粉故名

後魏謠

後魏時青州有俗囂薄京師謠曰獄中無繫囚舍內無青州假令家道惡腸中不懷愁

後魏石像

大同府城舍和坊遼建華嚴寺奉安諸帝石像五銅像六內一銅像袞冕垂足而坐餘皆常服

地下受歲

後魏崔誼死十二年為沙門發墓而活言死時年十五今乃二十七是死仍受歲也塔寺記

劉晝

東魏劉晝乳昭上高歡書曰臣與優婆夷寔是僧之妻妾損胎殺子其狀難言今僧尼二百萬并俗女向有四百餘萬六月一損胎如是則年族二百萬戶矣驗此佛是疫胎之鬼也

張澹

西魏征南將軍鄧州張澹塚在冠軍故城有碑刻其背文曰白楸之棺易朽之裳銅鐵不入凡器不藏嗟爾後人幸勿我傷宋元嘉中為盜所發獲金銀器甚多原曹魏今悞西魏

木蘭

黃州黃陂縣隋木蘭縣北七十里有木蘭山有木蘭將軍塚廟曰忠烈將軍蓋朱氏女代父西征又歸德府城東南八十里有孝烈將軍廟完縣東孝烈將軍廟云木蘭女嘗代父戍守於此唐封為孝烈將軍一統志木蘭西漢時人後征十八年

帝聞其事詔納宮中蘭不從乃自經死帝驚閱贈將軍謚孝烈
見馮時可木蘭將軍贊一云木蘭姓魏毫之譙人廟祭歲四
月八日蓋其生辰也 嚴滄浪曰木蘭歌朔氣傳金折寒光照
鐵衣酷似太白非漢魏人語左舜齋曰况有可汗大點兵之句
乃唐人無疑魏大武時柔然已蹙可汗非始于唐也通篇較之
太白殊不相類詩家直說 嚴滄浪詩話木蘭歌文苑英華直
作常元甫名字郭茂倩樂府有兩篇其後篇乃元甫所作也

晉末僭亂

趙劉元海據平陽三主二十五年 後趙石勒都襄國六主三
十二年 燕慕容皝都薊遷鄴三主三十四年 秦苻堅都長
安五主四十四年 後秦姚萇都長安三主三十四年 南燕
慕容德據廣固二主十二年 南凉秃髮烏姑據樂都遷西平
三主十九年 北凉沮渠蒙遜據姑臧二主三十九年 西秦
乞伏國仁據苑川遷金城四主四十六年 後燕慕容垂據中
山鄴四主二十五年 夏赫連勃勃據朔方三主二十五年
後魏拓拔氏改姓元都雲中遷洛十六帝一百七十一年

北齊高氏都鄴五主二十七年 周宇文氏都長安五主二十六年

仙隱趙逸曰自永嘉以來二百餘年建國稱王者十有六君皆游其都邑目擊其事國滅之後觀其史書皆非實錄伽藍記

前溪

干兢大唐傳湖州德清縣南前溪村則南朝集樂之處今尚有數百家習音樂江南聲伎多自此出所謂舞出前溪者也復齋漫錄言陳劉刪詩山邊歌落日池上舞前溪唐崔顥詩舞愛前溪綠歌翻子夜長按智匠古今樂錄晉車騎將軍沈攸作前溪歌而非舞也蓋復齋不曾見于兢大唐傳故不知舞出前溪耳漁隱叢話歌舞以地者猶今曲之尚海鹽腔也元澈浦楊氏官提舉家僮數百指教以新聲傾聽一時

明初楊氏坐法戍雲南梨園祖其聲不衰亦前溪之例也

中說元經

文中子謂文士之行可見謝靈運小人哉其文傲君子則謹沈休文小人哉其文治君子則典絕昭江淹古之狷者也其文急

以怨吳筠孔珪古之狂者也其文怪以怨謝莊王融古之纖人也其文碎徐陵庾信古之夸人也其文誕或問孝綽兄弟子曰鄙人也或問其文淫或問湘東王兄弟子曰貪人也其文繁謝眺淺人也其文捷江總詭人也其文虛子謂顏延之王儉任昉有君子之心焉其文約以則

元經天子之史也書帝正月非也程子微言

元經始帝晉卒授魏明天命之有在晉宋齊梁陳亡哀中國之無人卓然於明道而其書不傳今元經存殊駁野蓋偽書函史

墨蹟

五代陳世祖時征北軍人於丹徒盜發晉却曇墓大獲晉右將軍王羲之書及諸名賢遺蹟事覺其書並沒縣官藏於秘府世祖以子伯茂好古多以賜之

陳後主子

福建永春縣陳岩山王應廟祀威應侯陳後主叔寶三人長曰鏡臺翁季曰易簡為御史中丞侯居中名不傳少習兵法為時豪征南趙擊醜虜有功隋既平陳侯兄弟三人引兵南奔據

桃林塲之肥湖後隋帝有旨令鏡臺釋兵命有司四時祭其父祖其編籍為民與其兄弟分居三所鏡臺翁居祀湖之瑞峯易簡居慕仁里溪西而侯隱東巖峭峯歲時挈鞍秣馬往返桃源間一夕憇桃源驛東偏留弓劍後沒屢著靈應鄉民即地祀之按陳書後主二十二男皇太子深會稽王莊吳興胤南平王嶷永嘉王彥邵陵王莸南海王虔錢塘王恬信義王祗南平王東東陽王恮吳郡王藩餘子十一人總觀明綱統冲洽縹緲威辨並未及封其所封諸王無一征南粵擊醜虜者且俱從入閩安得南閩而潛之也前見閩書頗異傳疑可也

景陽井銘

隋煬帝景陽井銘曰前車已覆後乘沒

鼓山神鉦

武安縣南三十里鼓山上有二石如鼓形世傳鳴則兵起故名神鉦南齊之末此鼓鳴齊亡隋末鼓聲聞數百里隋亡又云中
有竹林寺五百羅漢所居隱而不見按齊志云文宣帝天保末常使人往此寺取經函使者辭以不知帝曰卿取我駱駝乘之

則自至矣使者如山果見一寺寺門有數僧相謂曰高洋路駝
來也問使者曰爾天子使汝來求何曰帝命於市東郭從北第
一房取經函及尺八黃帕等僧共取與之後不復見至今山中
居人時有聞其鐘聲及聞梵音者皆然皆莫知其處帝常自鄴
都詣晉陽往來山下故起離宮以備巡幸於此山腹見數百聖
僧行道遂開三石室刻諸尊像因建寺名石窟今常樂寺也見
金宣奉大夫刑部尚書胡勵記中

石經

石經大學是魏政中和詔諸儒虞松等考正五經刻之於石而
大學中庸行 松表述賈逵之言曰孔伋窮居於宋懼先聖之
學不明而帝王之道墜故作大學以經之中庸以緯之則學庸
皆子思所作至唐龔十三經註疏多妄為改竄今人不見石經
遂以唐為古本其寔非也明皇最穿鑿既亂大學次序又刪去
顏淵問仁五句孝經刪去閨門一章洪範亦改頗陂字嘗見明
皇老子注云我獨異于人而貴求食於母原無求於二字朕所
加也蓋其妄每每如此焦澹園集

佛圖戶

魏獻文帝皇興三年令罪民及官奴為佛圖戶魏徒青齊民於平城桑乾僧曇曜奏其民有能輸粟六十斛入僧曹者即為僧祇戶粟為僧祇粟備凶歲饑民又請民犯重罪及官奴為佛圖戶供諸寺洒掃並許之

七聲

周武帝時龜慈人曰蘇祇婆從突厥皇后入朝善胡琵琶聽其所奏一均之中間有七聲一曰婆陀華力言平聲即宮聲也二曰雞識華言長聲即商呂聲也三曰沙識華言質直聲即角聲也三曰沙侯加濫華言應聲即變徵聲也五曰沙獵華言應和聲即徵聲也六曰般瞻華言五聲即羽聲也七曰侯利建華言斛牛聲即變宮聲也譯曰習而彈之始得七聲之正

智者大師

智者大師書陀羅尼經四卷存天台山大慈寺後傳于慧明寺在縣東北六十里宋時亡失僅留其一嘉靖間為兵憲譚綸取去今所存是宋元通法師補書者

白王

會稽山土神白王云隋煬帝子封於白故名響王

丁覲

陳丁覲善書與智永齊名時為丁真永草

隋隄

河間寧津縣北三十五里隋隄云隋煬帝巡遊駐蹕於此令軍士築隄如垣有居民取姓守道守義者進膳帝嘉之因以築隄賜名取村土民或稱隋隄又稱取家園

補隋忠臣

義寧二年象州守洛陽歐陽祐官滿西歸至郟陽聞隋止挈家自溺大軋山河中土人殮葬之郟人祠祀焉

宗室世系

唐書歐陽修宗室世系表云李氏出自嬴姓帝顓頊高陽氏生大業大業生女華女華生臯陶字庭堅為唐大理生益益生思成歷夏商周為大理以官命族談遷曰益為臯陶子昔人嘗辨之矣

秦王山

豐潤縣東北二十里有山名不傳高可三里許無他木惟荆叢
生世稱唐太宗為秦王時東征凱旋登山見荆乃愕然曰此吾
師曩時教我朴也遂下馬拜之荆首皆下垂如人俯伏狀至今
然猶然石上有秦王下馬跡因名秦王山

牛口峪

臨城縣西二十五里牛口峪昔有童謠曰竇入牛口勢不得久
竇建德為唐兵所破走至此果被擒

高識傳

唐初傅奕集晉魏以來闢佛者作高識傳

避諱

唐太宗諱世民偏傍犯如葉字作葉字泚字作泚字

劉黑闥

劉黑闥卜種植得九五飛龍卦以反叛至於誅僂其時解者曰
飛龍指唐太宗也明主高陽民人力耕供上即為利見大人之
象黑闥不知自取冥行之凶

薛仁果

薛仁果本薛仁果唐史誤以果為杲見歐陽詢所書御製六馬贊云鴈白蹄烏平薛仁果時乘

入閣像

唐有大內又有大明宮在大內之東北世謂之東內高宗以後天子多在大明宮之正南門曰丹鳳門內第一殿曰含元殿門大朝會則御之第二殿曰宣政殿謂之正衙朔望大冊封則御之第三殿曰紫宸殿謂之上閣亦曰內衙復日常朝則御之天

子坐朝須立仗於正衙殿或乘輿正御紫宸即喚仗自宣政殿西門入是謂東西閣門也以本朝宮殿視之宣德門唐丹鳳門也大慶殿唐含元殿也文德殿唐宣政殿也紫宸殿唐紫宸殿也今欲求入閣本意苑於儀典須先立仗文德殿延如天子正御紫宸即喚仗自東西閣門入如此則差儀與舊儀合但今之諸殿比於唐制南北不相對耳又按唐自中葉以還隻日及非時大臣奏事別開延英殿若今假日御崇和延和是也乃知唐制每御坐朝日即為入閣其後正衙立仗因而遂廢甚非禮也

宋泰知政事宋庠奏議

朝元閣

唐詩朝元閣上西風急都入長揚作雨聲喬禮書希大宇為太常少卿祀西岳為子言親歷其地有楊數株猶在閣基之西非宮名也張志淳南園漫錄

鑄錢郡字

武德中鑄開元通寶錢錢有益字則成益所鑄有潤字則丹陽所鑄餘倣此

直棘恒豐和記

魏鄭公徵狄梁公仁傑張燕公說墓棘直不岐共以為異陳師

道後山談叢

龍毛

雒縣寺塔為龍所護側有三池莫測淺深三龍居之人莫能臨視貞觀十三年三龍大鬪雷霆震擊水火交飛久之乃息人皆拾得龍毛長三尺許黃赤可愛毛一作鬚佛藏梵字函

袁天綱題石

方士表天網見閬州錦屏山題其石曰此山磨滅英靈乃絕

麻姑

麻姑姓黎字瓊仙唐放出宮人也耕餘雜錄

諸陵

高祖獻陵三原縣東北十八里陪塋諸王十六公一功臣六

太宗昭陵醴泉縣九峻山陪塋諸王七公主二十一妃嬪八諸

臣墓宰相房玄齡杜如晦魏徵馬周岑文本崔敦禮李勣李靖

溫彥博蕭瑤高士廉長孫無忌許敬宗十三人三品丞郎唐儉

姜晦李大亮虞世楠杜正倫姚思廉褚亮薛收馬載段倫張復

胤孔志亮閻立本房仁裕竇庭蘭盧貞松裴藝李珍等五十三

人功臣大將阿史那思尉遲敬德秦叔寶周護仁等六十四人

高宗乾陵乾州西北五里梁山與武后合陪塋太子二諸王三

公主一 中宗定陵富平縣西北十五里龍泉山陪塋太子一

公主五 睿宗橋陵蒲城縣豐山陪塋太子三公主三 讓帝

惠陵蒲城北十五里陪塋諸王三公主三 玄宗泰陵蒲城金

粟山 肅宗建陵乾州武將山陪塋郭子儀

尉遲敬德城滁州

唐初修滁州子城及西水關。明胡松嘗行視其下，見其石上有尉遲敬德監造數字，敬德傳不云有事于滁，而石上云云。要之不誣。

高宗論史

顯慶中，令狐德棻、劉胤之撰國史，許敬宗復加叙次，帝恨敬宗所記失寔，命宰相刊正，且曰：朕昔從事未央宮，辟仗既過，有橫刀伏草中者，先帝歛轡卻謂朕曰：事發當死者數十人，汝可命出之。史臣惟叙此為寔，郝處俊曰：先帝仁恩溥，將如此類，非一臣之弟處傑被釋供奉時，有三衛誤拂御衣者，懼甚，先帝曰：左右無御史，我不汝罪。帝曰：此史臣應載。處俊乃表左史李仁寔刪整偽辭，會仁寔死而止。

木葉遼陽

沈佺期詩：九月寒砧催木葉，十年征戍憶遼陽。木葉地名，或曰下葉亦地名。按遼史：歲幸木葉山，則非下葉也。

花黃果黃

槐花黃舉子記 枇杷黃醫者記 橘子黃醫者藏續世說

章懷太子墓銘

武后忌太子廢為世人徒巴州使呂神積逼令自殺墓銘曰斷一指得天下凡人不能為殺愛子竊帝位武后行之噫嘻賢之遺隧萬世之元龜

李龍遷墓

四川龍州宣撫司東南百五十里牛心山昔李龍遷墓于山側唐武氏革命鑿斷山脉水赤如血玄宗幸蜀有老人蘓坦奏龍州牛心山國之祖墓今日蒙塵之禍乃則天掘鑿所致玄宗即命刺史修填如舊未幾誅祿山乃陞州為都督府賜號靈應郡

狼山都督府

高宗永徽元年立狼山都督府在今宣府良山之南地多瓦礫永樂初掘地者得斷碑並柱礎焉

何仙姑

何仙姑廣州增城人生而頂有六毫武后時駐雲母溪夢神人教之食雲母粉當輕身不死姑取餌之常往來山谷間行步如

飛後漸辟穀語言巽常武后遣使召赴闕中路復失景龍中白日昇天天寶九載見於麻姑佇立五色雲中大曆中又見身廣州小石樓今云宋時人不省所謂

駱賓王

駱賓王義烏縣東二十里上楓塘賓王父履元任博昌令

女論語

宋若華著女論語十篇大抵倣論語以帝宣文君苻堅時常暹母宋氏傳周官代孔子曾大家等為顏冉推明婦道所宜女弟若昭又為傳申釋之

長生殿

臨潼縣南溫泉宮天寶六載改為華清宮其齋殿曰長生殿天寶元年作見寔錄有事於朝元閣即齋沐此殿殿南近東有明珠殿

程大昌雍錄曰溫泉在驪山與帝都密邇自秦漢隋唐人主皆嘗游幸惟玄宗時侈蓋即山建宮百司庶府皆行各有寓止自十月往至歲盡乃還宮又緣楊貴妃之故其奢蕩特為章著大

抵宮殿包裹驪山一山而繚牆周徧其外觀風樓下又有夾城可通禁中白樂天追咎其事作歌以為後監世喜傳誦然詩多不得其寔也華清宮者本太宗溫泉宮也天寶六載始名華清而楊妃入宮以太真得幸已在三載則華清未名而妃已先幸今日春寒賜浴溫泉池始是初承恩幸時此已誤矣而又記其款昵則曰七月七日長生殿華清宮固有長生殿而其地乃齋宿禮神之所本非寢殿帝又未嘗以七月至驪山則白歌皆不審也

太甲

王勃夫子廟碑華蓋西臨藏五雲于太甲晉天文志華蓋七星杠下九星合十六星太甲恐是六甲鄭以偉詩註

武成閣

唐初功臣皆云圖形凌烟閣河間元孝王碑與段志玄碑皆云圖武成閣豈愛烟閣元名武成耶見西谿叢語

花鳥使

天寶中密號採取艷异者為花鳥使

李如暹

元微之新顯樂府延州鎮李如暹蓬子將軍之子也常沒西蕃及歸自云蕃法惟正歲一日許唐人沒蕃者服衣冠如暹當此日悲不自勝遂與妻密定歸計

滕王元嬰

滕王元嬰高祖之子也永徽初王以驕恣不法請致除始王寔封千戶為金州刺史驕縱失度在太宗喪集官屬宴飲歌舞狎昵廝養巡省部內從民借狗求置所過為害以丸彈人觀其走避則樂城門夜開不復有節高宗以書切責曰朕以王室親不忍置法今署下上考異媿王心久之遷洪州都督官屬妻美者給為妃名逼私之嘗為典籤崔簡妻鄭嫚罵以履抵元嬰面血流乃免元嬰慚歷旬不視事後坐法削戶及親事帳戶之半謫置滁中

杜甫詩 滕王亭子君王臺謝枕巴山萬丈丹梯尚可板春日鶯啼修竹裡仙家犬吠白雲間清江碧石傷心鹿嫩藥濃花滿目班人到於今歌出牧來游此地不知還又寂寞春山路君王

不復行古塙猶竹色虛閣自松聲鳥雀荒村莫雲霞過客情尚
思歌吹入千騎把霓旌

玉臺觀滕公自注

中天積翠玉臺遙上

帝高居絳節朝遂有憑夷來擊鼓始知羸女善吹簫江光隱見
鼉鼉窟石勢參差烏鵲橋更有紅顏生羽翰便應黃髮老漁樵
又浩劫因王造平臺訪故游綠雲蕭史駐文字魯恭留宮闕通
群帝乾坤到十州人傳有笙鶴時過北山頭宋嘉泰甲子建安
蔡夢弼曰滕王元嬰調露年間任閩州刺史在閩州有亭洪州
有閣又有碧落碑趙子櫟曰以魯恭比滕王必有文詩遺蹟在
焉

譚遷曰古人湮沒多矣滕王以杜甫王勃至今著杜弼詩史
果貽玷閩州獨無少刺乎必易行改輒不僅僅景物增勝也

追貶楊素

武后追貶隋楊素詔曰朕上嘉賢佐下惡賊臣嘗欲從容于萬
幾之暇褒貶于千載之外

梵勅

韶州南華寺武后勅免差役今存勅梵書墨跡如新

曹溪通志

一行

僧一行知公張公謹之孫博覽經史武三思慕其名請結交逃
匿隱于僧梵

玄宗見道

不物物我我不是是非非忘意非我意得非我懷玄宗

天子別號

玄宗自稱上清弟子見華陽頌 武宗自稱承道繼玄昭明三
光弟子南岳上真人見會昌投龍文

戒牧宰碑

彰德林縣令廨內有唐開元末明皇戒牧宰碑口勅曰朕本求
牧宰務在理人前所策試恐有遺佚載令中書門下銓擇得卿
等高科副朕旁求之意郡縣者國之本牧宰者政之先朕每屬
意此官有殊餘職頃來刺史縣令多不得人致令戶口未能安
業斯亦朕之不德所致寤寐勞想揚搜所知親加試擇卿等寔
為舉首深副朕懷今故與卿相見卿等到任之日百姓間有不
安穩事一一條奏朕別知聽察佇卿政能若一任之日內百姓有

聞當擢以不次有非常賞若不達朕意苟復曰循亦當有非常
罰朕此采可謂求仁得仁何憂郡縣不理又勅曰朕閱茲下人
不忘鑒寐庶乎富教寄存牧宰所以推擇才能親加考覈卿等
各膺時用副朕虛求亦既得人佇聞佳政若能銳精為理聲績
有稱即當待以不次信此言之可復如其政不能果行且有遺
豈獨取于厥躬必將坐于舉主此亦明約不得不然各宜勉之
以成名節今賜卿少物刺史七十匹縣令四十匹各宜領取並於廟堂坐食
食訖好去又曰適已勅卿賜宜領取卿等到任之日宣慰百姓
知朕憂勤是選舉三十八人有林暉為林慮縣令彰德府志

宋璟薦鄭勉

開元時宰相宋璟荐儀州司馬鄭勉有才略文詞但性好異端
好是非改變若全引進則悔吝必至若長棄捐則才用可惜
改碭州刺史

鳳爪傷龍

開元中有鳳逐二龍至華陰龍墜地化清泉二道其一為鳳爪
傷流血泉色遂赤今有赤地山

談遷曰龍鳳俱鱗羽之長稱神物御輦帝龍飾后鳳飾而二龍見傷于鳳宜往往帝為后所制也

張萬歲王毛仲

唐人養馬于涇渭近及同華置八坊其地止千二百三十頃樹
昔菑苜蓿用牧奚三千官寮無幾衣食皮毛是資不取諸官蓋
合牧而散畜之專其事不雜以耕而太僕張萬歲王毛仲官職
雖尊身本帝園生長北方貫歷牧事躬馳撫閱無黜集追呼之
擾科索之煩順天回地馬畜滋殖萬歲至七十萬六千毛仲至
六十萬五千六百有奇色別為群號稱雲錦地惟不窮增置河
西史贊其盛圖傳至今夫豈有他術哉法簡而專誠而不二故
也 平涼府志

亢倉子

宜城王任原年十八登陵踐恒岳過薊門山問道于隱者元知
運入太行山採藥經王屋穿小有洞訪大白山習隱訣躡終南
山天寶四載語詔徵京邑論校孟浩然所著有亢倉子

楊貴妃

楊貴妃容州晉寧衛雲陵里人父維母葉氏生妃有異質都部
署楊康求為女時楊琰為長史又從康求為女攜歸京後進入
壽王宮玄宗召為貴妃今梧州容縣有楊妃井許子真記
長恨歌載玄宗避暑驪山以七月七日與貴妃並肩誓心願世
世為夫婦天寶遺事又言帝與貴妃每至七月七日夜在華清
宮游宴宮女皆陳瓜果乞巧皆悞也攷之史玄宗幸華清宮皆
以十月其返皆以二月或四月未有過夏者野史之不足信往
往如此五雜俎

聽鷓鴣聲

天寶十年韋邠公涉謫守蘄州時李泌亦以處士放逐因夜飲
聞鷓鴣常公泣下李曰此鳥人以為惡其聲可聽乃令坐客有
不聞其聲者罰以大白由是聽之不厭

公主入道

玄宗女萬安公主 代宗女華陽公主 德宗女文安公主
憲宗女永安公主 穆宗女義昌公主安慶公主時天下觀一
千六百八十七

張九齡

劉夢得集言曲江為相建言放臣不且與善地因致燕翼無似
終為餒魂近世籌疇諸小說皆曰之不改之過也當 徐浩作
公碑銘明言嗣子拯居喪以孝聞立身以行著陷在寇逆不受
偽官及收復西京特制拜朝散大夫右贊善孫藏器河南府壽
安尉永保先業克稟義方是公且有賢子孫矣及見唐書宰相
世系表九齡子拯右贊善大夫拯子藏器長水丞藏器子敦慶
袁州參軍敦慶子景能景能子謂嶺南觀察衙推弟鄖湖南鹽
鉄判官謂子浩仁化令孫文嵩監東大倉自九齡至文嵩八葉
之中仕官不絕而夢得云云非竊語耶一時浮言聞之不加審
諦輒形帑墨世之類此者當為不少焦竑題曲江集

天寶迴文詩

范陽盧某母瑯琊王氏於景龍中撰天寶迴文詩九八百一十
二字誠其子曰吾沒之後爾密記之若逢大道之朝遇非常之
主當以其圖上獻至玄宗朝東平太守始上之高適代為之表

安祿山反兆

安祿山城雄武扼飛狐塞王宗嗣上言祿山且亂此宗嗣之先
識也時祿山以薊為巢穴恐河東之勁兵搆之飛狐塞則兵無
從入矣大同鎮志

飛狐今之黑石嶺也宣大入中原惟有二門居庸直其後紫荆
當其前由後必於雞鳴由前必於飛狐

安祿山將反前數日集大將十餘人宴賚甚厚蒲廳施山川險
易攻取剽劫之勢每人付一圖令曰從某處會洛陽有違者斬
諸將承命莫敢出聲及至洛陽志知其畫出聞鼓吹

畢炕

唐平大守畢炕拒安祿山城陷覆其家唐書附其父畢構傳不
見於忠義傳溫公通鑑亦失書楊慎

李林甫詩

李林甫贈韓席侍郎詩揆子秉孤直虛薄忝文昌

王維

王右丞維曰其父官司馬徙家汾州然寔邠人也明萬曆間
邠閻氏築宅忽地陷得骼櫬宛然中有甕枕枕上有剔銀灯詞

乃右丞父聞泥金喜信作也邑人李無言倡初上同志歛錢改
曆譚元春嶽歸堂集

成化間北京大內厚載門有丹漆巨槌以支北扉久矣槌偶墮
地破乃髹竹也中藏卷三其一王右丞圖山水呈 上覽明日
賜大監黃賜用細練高尺二寸長四尺奇前後周完末正書曰

王維製

端正樹

玄宗發馬嵬至扶風道上有石楠樹團團愛玩久之呼為端正

樹 孫景安征塗記馬嵬人名于此築城以避難未詳何代人
姚萇時扶風王駢以數千人保馬嵬故城
興平縣南二十五里有楊妃塚又有馬嵬故城馬嵬故驛馬嵬
泉楊妃塚前有土如粉人謂之楊妃粉

金帶補

玄宗幸蜀偶值村婦解金帶賜之至今名其地金帶補

明喻時詩村婦是何人高麗得天子帶還似愛玉奴不恤中原害

內臣妻

高力士妻 氏 李輔國妻吏部侍郎元希聲姪女又內侍妻
王氏墓志王孟諸撰

于闐國王勝

肅宗時于闐國王勝入朝讓國于弟曜身留宿衛三十年生子
銳曜上書以國還銳天子遣之勝止不遣

南霽雲

貴州多祠南霽雲名曰黑神或曰霽雲死為神主南嶽故南人
祀之子承嗣清江郡太守多善政今思州隋清江也黔記

于休烈

于休烈為太常少卿兼修國史于時經大盜後史籍燔闕休烈
奏國史寶錄等書二千八百篇藏興慶宮焚蕩皆盡請下御史
覈史館所由求府縣有得者許上送官一書進官一資一篇絹
一匹凡數日止獲一二有常述以其家藏國史百三十篇上獻

孝經

孝經開元中刪閨門一章以劉炫偽之也朱文公定孝經收小
旻戰兢一章

佛經

隋大業時佛經六千一百九十八卷唐開元時五千四十八卷
宋雍熙初增新經凡九千五百卷

春秋

趙啖曰春秋明白如日月簡易如天地

寒食

開元初勅寒食上墓近代墓祭蓋出于此

邯鄲夢

邯鄲呂仙祠馬攀龍記云枕按枕中記開元中呂翁經邯鄲道
中授盧生枕而呂純陽或云生于德宗貞元戊寅或云文宗開
成始舉進士游長安相距遠甚祠中乃像鍾離翁泪純陽為非
是或又云謂盧之炊黍就枕之夢黃梁未熟之夢相似本一事
也訛而為二然亦不可攷矣

八閔齋會石幢

歸德唐之宋州也有八閔齋會報德記石幢顏真卿書在故開
元寺中會昌間寺廢因毀幢之半後刺史崔倬墓刻之幢形八

觚頂如覆釜其記宋州刺史為河度節度田神功建神功救李岑解宋州之圍也

韋應物

韋蘇州少以三衛郎事玄宗毫縱不羈玄宗崩始折節務讀書故其逢揚開府詩少事武皇帝亡賴時息私身作里中橫家藏亡命兒朝持擗蒲局莫窈東隣姬司隸不敢捕立在白玉墀一字都不識飲酒肆頑癡韓子蒼

元結

元魯山山居阻水絕食而死王元之小畜集

杜甫詩籤

射洪陸使君廟以杜甫為籤極靈陸游渭南集

蜀人以釜為銚杜詩荆扉生蔓草土銚冷踈煙

花卿

杜子美贈花卿詩錦城絲管日紛紛：半入江風半入雲此曲祇應天上有人間那得幾回聞趙子櫟曰古歌詞載林鐘宮小調入破第二云錦庭絲管曉紛紛：半入雲山半入雲此曲多應天

下有人間能得幾回聞
梅花鄉名敬定劍南節度崔光遠之末
將也黃山谷曰楊明叔為余言花鄉塚在丹稜之東館鎮今至
有英氣血食其鄉見封為忠應公

王母鳥

杜子美郊壇歌子規夜啼山竹裂王母晝下雲旂翻宗中官陳
彥和在宣和間掌禽苑言蜀中貢王母鳥狀如燕色紺翠尾甚
長飛則尾開鷓臬如兩旗

小寒食

小寒食見杜詩

李伯禽

貞元五年李白子伯禽為嘉興乍浦下場雜鹽官侮慢神廟以
死太平廣記

蔡泌

晉江蔡泌貞元中進士按歐陽詹登第為闈破荒蓋馮韓文公
歐陽生哀詞而舊志載泌先歐登第未知何年閩書

私白

唐時諸道進私白閩中為盛杜宣猷來為福建觀察使每寒食遣吏分祭其先壟時謂宣猷為勅賜墓戶私白者閩兒也

僧懷濬

福州僧懷濬有上懷州刺史詩二首家在閩中東復東其中歲歲有花紅如今不在花紅處花在舊時紅處紅家在閩中西復西其中歲歲有鶯啼如今不在鶯啼處鶯在舊時啼處啼此詩似竹枝詞類今吳歌然卻有三百篇之旨

韓家莊

吏侍鉅鹿耿裕考韓文公家莊在懷慶府孟縣西十里孟本唐河陽故城在孟縣南十八里唐末廢河陽置孟縣國初因之為孟縣公寔河陽人生有歸河陽省墳墓之文沒亦墓于是皇甫湜撰公墓碑云歸河陽韓氏先茔則公為河陽人本無疑者不以訛為南陽人蓋南字即河字之誤抄錄者之過也公集中言河陽者不一竟無一語及南陽公豈忘本耶又縣東有韓莊韓湘塚則公世居於是而云他何也

修武縣東北三十里曰南陽縣韓文公之故里也居人呼其地

曰韓莊又曰韓村愈自上世居此按李翱為愈作行述曰昌黎人而愈亦嘗自稱昌黎又皇甫湜為愈作墓志銘不言鄉里李白作愈父仲卿去思碑曰南陽人嗣後劉煦舊唐書列傳亦曰昌黎人蓋本諸行述而歐宗新唐書乃增曰鄧州南陽人蓋本諸去思碑而悞加鄧州二字也昌黎古韓氏通稱如李必曰隴西崔必曰博稜孫必曰樂安耳今修武之韓庄有愈墓存焉則愈之為修武人明矣河南通志

永平府昌黎縣西五里愈韓高祖以上之墓地自其曾祖泰任曹州司馬回家於河陽子陽不復在此永平府志

大顛

韓退之問大顛曰師春秋幾何大顛提數珠示之曰晝夜一百八退之惘然問首座曰和尚言晝夜一百八意旨如何首座叩齒而已他日復見大顛問曰晝夜一百八意旨如何師亦叩齒于是退之自喜曰今知佛法無二道也時大顛即石首座問信然即杖而逐之汾陽照禪師偈曰解展机鋒是大顛明知不是小因緣一般叩齒叢林異出險韓公始得閑

談遷曰此僧家假托昌黎并誣大顛也昌黎問年如吾輩平常寒溫非問佛法也在大顛自實告正不必作如許伎倆若概如此則名緇之前措不得一閑語矣且昌黎篤實人果有此荅伊且笑而置之叩首座何為

韓木

潮州無椽木韓文公植椽于韓山移其種之他山不椽也土人名椽曰韓木郭子章粵草

退之像

晏公嘗于昌黎見韓退之像與歐陽永叔絕類故目永叔為韓公再來

茶仙

杜牧之詩誰知病太守猶得作茶仙宋滁州僧永建茶仙亭

綠野亭堂

裴晉公綠野堂乃李龜年故第後傳至宗王旦不取張齊市賢市之

陽城驛

商州南山陽城驛元稹貶江陵過之不忍呼其諱改為避賢郵
白樂天在翰林聞而和之又見在紫微富水驛注富水驛舊名
與陽諫議同王元之集

孫樵家僮

孫樵家僮犀角鴈兒見祭馮諫議文

白雪樓五客

鍾祥縣石城下白雪樓下臨江李昉守郡時畫五禽壁問鶴曰
仙客孔雀曰南客鸚鵡曰西客鷺鷥曰雪客白鷗曰閑客

釋道英

釋道英戒德克全名振天邑住寺在布政坊咸亨中見鬼物寺
主慧簡嘗曰曉見二人不踐入英院焉簡怪而問之英曰向
者秦莊襄王使使傳語饑虛甚久以師大慈欲望排食并從者
三百人勿辭勞也吾以報云後日曉具饌可來專相候耳簡聞
言以酒助之及期果來侍從甚嚴坐食倉皇謂英曰弟子不食
八十年矣英問其故答曰吾滅東周絕姬嗣或責以功德惟以
赦宥於恤惻獨塞之終為未補福少罪多受對未畢今此一餐

更四十年方復得食曰歷指座上云此是白起王翦為殺害多
罪報未終又云此陳軫以虛詐故 英曰王何不從人索
食而甘虛腹此奚可忍乎王曰慈心甚少吾緣貴人不可妄行
崇禍所以然也垂去謂英曰甚感傷費厭飲弟子有少物即送
相償城東通化門外去塚銳上而高大吾棲神之所世人不知
妄云呂不韋塚耳英曰往遭赤眉開發何有物來曰賊取不得
曰貧道非發丘中即出家人無用物必勿將來言諫訖長揖而
去

董召南故里

壽州安豐鄉古屬縣唐董生召南故里其地多陂池好田物產
饒故老長者稱說董生猶能傳其行事

賈島

房山縣南十里石樓村有唐詩人賈島墓又景州西南五十里
賈島村一曰賈島峽峪

吐蕃

唐憲宗時吐蕃使其中書令尚騎心兒攻燉煌刺史周鼎嬰城

固守鼎請救回鶻踰年不至都知兵馬閻朝殺鼎自領州事守城者八年出綾一段換麥一斗存者甚衆朝喜曰可以死守又二年糧械皆盡登城呼曰如毋從他境請以城降騎心見許諾於是出降自攻城至是十一年州人皆改服臣虜歲時祀祖父衣中國之服號慟而藏之

穆宗時遣大理卿劉文鼎出使吐蕃道成紀武川以至龍支城耆老千人拜且泣問天子安否言頃從軍戰沒于此今子孫未忘唐服朝廷尚念之乎兵何日來言已皆嗚咽問之豐州之人

也

石經

恒豐和記

文宗太和七年石刊九經并孝經論語爾雅共一百五十九卷字樣四十卷開成二年告成今在西安文廟碑洞中

門堠

唐盛時京師開遠門外立堠云去西安西九千九百里以示我人不為萬里行

偽書

白樂天先有秦中吟及百部判皆為書肆市賈題其卷云白才子文章後輩好偽作余詩傳流諸處自到會稽已有人寫宮詞百篇及雜詩兩卷皆云是余所撰及手勘驗無一篇是者樂天於翰林中書取書詔批荅詞等撰為程式禁中號曰白樸每有新入學士求請竇重過於六典也以上俱元微之詩自注

甲門

近世不以勲賢之胄為令族而以尚盧澤李為甲門見元稹送王師範詩註

度外星辰

交廣間南極浸高北極浸低圓規度外星辰至衆大如五曜者數十皆不在星經元氏長慶集詩註

錢塘公館詩

龍溪周匡物錢塘公館詩萬里茫茫天塹遙秦皇底事不安橋錢塘江口無錢過又阻西風兩信潮按旄肩吾亦有此詩天塹茫茫連沃焦秦皇何事不安橋錢塘渡口無錢納已失西風兩信潮

六詔

蒙篤詔越折詔浪寧詔鄧朕詔施浪詔蒙舍詔

星命

李虛中 deepest 於五行書韓文公志其墓

命書本於都利韋斯經都利蓋都賴也西域康居城當都賴水上則今所傳韋斯經者婆羅門術也李弼乾寔婆羅門伎士而羅喉計都亦胡楚之詔

軌革卦影

軌革卦影見宋類苑今術家畫休咎或龜或鸚鵡啣出以為驗

崔鶯鶯

予於粵西見唐李給事撰崇陽鄭府君夫人博陵崔氏墓志銘云夫人四德兼備六親雍和母儀內則動靜可思禮行詩諷進止成法以大中九年正終於淇澳年七十有六子六人項珮瑾玳璿琬皆有名位其志瘞土久矣成化間畊者得諸廢塚鬻之鄭氏為中亭香案石又若干年而魏縣令愛其迹置之邑治陳仲醇又以其文刻之古文錄曰崔氏一辱於元微之會真記再

辱於伶工戲狎褻侮越千百載而後為崔氏一洗冰玉之恥然
子疑崔氏未嫁失身于元惡有冰玉可洗其後見三水續志云
崔雙文美麗絕世才德踰人元稹以中表親相逢逆旅挑之固
扼不從稹銜投梭之恨偽會為真記自撰往來問荅書以辱崔
氏其後居位論者及此事於章疏此足信哉稹樂天齊名稱元
白居易始終以直道與天子爭可否而稹附離權勢排陷裴度
等諸君子阻撓蔡功其後徽倖得相名望漼然彼固傾險士不
難于謗諸君子而難于辱一婦人乎會真記文絕佳而風流事
又為人喜談樂道孰為洗之吁嗟千古以來正士之被傾賢女
之被沾者不少矣馮時可稗談

元微之狂醉詩一自柏臺為御史二年辜負兩京春岷亭今日
顛狂醉舞引紅娘亂打人

薛濤井

成都府錦江南岸舊名玉女津水極清剛今入蜀王邸內環以
欄楯人不敢汲專備製箋之用歲三月三日汲水造箋二十四
幅入貢止四幅餘留蕃郡以餽時貴今皆他日造未必三月三

日也市肆門絕無貿者

唐曹因墓志銘

君姓曹名因字鄙夫世為鄱陽人祖父皆仕唐高祖朝唯君三
舉不第安命樂道繩墨自守及卒於長安道朝士里人无不
息予獨不然慰其母曰百畝足養百卷足遺縱浪大化游戲小
兒死生聚散萬古常常耳何足掛靈府武子周氏君室也歸君
八載恩至義篤故贈之銘銘曰其生也天其死也天達人觀
哀復何言

陷虜子孫

肅宗初召邊兵赴難吐蕃因陷河西隴右華人百萬皆陷於虜
文宗時嘗遣使至西域甘涼瓜沙等州人夾道迎泣曰皇帝猶
念陷番人民否其人皆天寶陷虜者子孫其語言稍變而衣服
猶不改

呂岩

呂岩蒲州永樂縣人會昌中再承進士不第遇鍾離子得道河
東呂陽曰岩謂之孫海州刺史讓之子咸通中擢進士第

東都九老會

前懷州司馬安定胡杲年八十九 衛尉卿致仕馮翊吉改年
八十八 前磁州刺史廣平劉真年八十七 前龍武軍長史
滎陽鄭據年八十五 前侍御史內供奉官范陽盧真年八十
三 前永州刺史清河張渾年七十七 刑部尚書致仕白居易
易年七十四 秘書狄兼謨河南尹盧貞以年未及七十雖與
會而不及列會昌五年三月二十四日會東都履道坊各賦七
言四韻詩一章

麒麟草

元和時館閣陽飲待學士者煎麒麟草

早藕

大曆中高郵民張存以踏藕為業嘗於坡中見早藕大如臂極
力掘之深二丈大至合抱似不可窮乃斷之中得一劍長二尺
色青無刃存不知寶郡人有知者以束薪易獲焉其藕無絲

揚州志

石孝忠

石孝忠者生長韓魏間有膂力少時偷雞狗州里苦之後折節

事李愬前驅元和中天子用裴丞相征蔡愬與光顏重胤皆受丞相節制明年蔡平刑部侍郎韓愈撰碑專歸功丞相孝忠見其文大恚怒曰作力推其碑吏不能止及執詣節度使命具獄將斃之碑下孝忠度必死乃佯卧地若不勝按驗狀吏就詰之孝忠伺察隙用枷尾拉殺之上聞之使送闕下及至問曰汝推碑殺吏為何對曰臣死未足塞責今得面天顏一言赤族無憾臣事李愬歲久平蔡之日臣在軍前吳秀琳蔡之奸賊愬降之李佑蔡之驍將愬擒之爪牙脫落而元濟縛今刻石紀功蓋歸丞相而愬名第與光顏重胤蓋愬固無言不幸更有一淮而其將如愬者復肯為陛下用手賞不當功罰不如罪非陛下所以勸人也臣惟碎石能推明愬績亦將為陛下正賞罰之源臣不推碑無以為吏擒臣不殺吏無以見陛下臣死不容矣請時就刑帝既得淮西本末且多其義遂赦之因命曰忠烈復召殿學士撰碑如孝忠語羅隱集

舉直禪師

舉直禪師懿宗子僖宗弟杖錫游揚州以太平倉地請於朝詔

建鎮國禪院居之仍賜號柔直後葺於院隅立浮屠五級元豐末發藏及隧得函柩全骨不解聯若鈎鎖俄見舍利發異光人驚異之揚州志

申包胥廟悞

劉蛻在江陵易伍子胥祠曰申包胥之廟宗於潛梅聖俞在蜀毀鄧艾祠更祠諸葛武侯

聖米

僖宗乾符六年二月秦州筦內四縣生聖米大如芡實

普聞禪師

邵武軍龍湖普聞禪師僖宗太子也幼不茹葷長無經世意僖宗鍾愛之然百計陶寫終不能回中和初僖宗幸蜀師斷髮逸遊人無知者造石霜問道言下頓省辭去至邵武城外見山鬱然深秀遂撲草至烟起處有一若行居焉苦行見師至乃曰上公當興此長揖而去師居十餘年一日有老人拜謁師問何住至此何求老人曰非人龍也住在此行雨不職上天有罰當死願垂救護師曰得罪於帝我何能力雖然可易形以來俄失老

人所在視坐旁有小蛇延緣入袖至暮雷電震山風雨交作師危坐不傾達旦晴霽垂袖蛇墮地去有頃老人拜泣曰自非大士慈悲腥穢此山矣今何以報即穴岩下古泉為他日多衆之設當時龍湖人聞其事施舍財力相與建寺衲子雲趨師闡化三十餘年臨寂聲鍾說偈而逝塔于本山謚員覺禪師五灯會元考唐史僖宗年二十有七而崩其幸蜀之年方二十一安得有子長無經世意又能斷髮遠遁者或唐諸王孫借太子之名出家耶

林慎思續孟子

林慎思字虔中長樂人自校書郎至水部郎中萬年令縣黃巢寇長安迫以偽祿不屈罵賊死慎思謂孟子七篇非其所著書而弟子所記不能盡孟子意因傳其說演而續孟子作續孟子又有紳蒙紳蒙有紳蒙子書

羅隱

唐末羅隱乞食晉江縣羅裳山下山下人侮之隱乃畫馬面石每夜出食人禾追之則見馬復入石山下人乃礼焉隱為画椿

繫馬馬不出矣今其跡瞭然好事者力鐫深刻欲与匹輒不久漫滅也又晉江縣石壁山石刻深扈二如画馬石蹟亦傳莆田縣大紺山南至崎頭二里許有羅隱廟故老云昔海中浮大木數百盡鐫羅字鄉人獲而鏤之逾鏤逾明相顧驚异數日見一人莪冠黃袍屹立山下曰我羅仙也行來居此言訖不見鄉人為立廟南唐封光澤王海商祈風分帆南北閩書

奚冠耳面

幽州節度使張仲武奏破奚北部落及諸山奚除舊奚王匿郎所管外殺僇首領丁壯老幼并殺擄牛羊熬燒車帳器械等計二十萬刺史以下面皮一百具耳二百隻李商隱代作表

楊筠松

唐末楊筠松與僕都監俱暗陰陽隸司天黃監巢亂時楊竊秘書中禁術及僕自長安走贛州寧都懷德鄉以其術傳里人廖氏

皮日休

廣明末皮日休避難徙會稽依錢氏官太常博士子光業事吳

越拜相見尹師魯皮子良墓志 唐書日休以著作佐郎出東

閔陷賊以識文被害悞甚 陸孝老學庵筆記

香奩集託名

香奩集和凝作託名韓偓

孤魂及第

唐末詔錄名士方干等賜孤魂及第

乾陵

溫韜徧發諸陵惟乾陵風雨不可發此事至今猶然絕不可解

于慎行雜記曰嘉靖戊申先君作吏隴右道出乾州其土人言
過武則天陵不可指議如有謾語輒以雷雨報之先君弗信為
一詩詆之云云出門正晴行不數里雷雨大作無可依泊得道
旁郵舍牛豕滿中不得已駐車馬仲兄無妄年甫十七再過其
地為賦一詩詆之其詞不記行至道中亦遭風雨千年虐焰猶
能作腥臊氣豈別是一種妖魂死而不能忘者耶

塚鬼上書

高軒發古塚取軌甃成都羅城鬼趙吞現形上書曰趙氏之寃

搏膺入梵良夫之狂披髮叫天有怨必仇無道則易流于往史
載在前文奮一介游魂九泉固象德不勝享禱不勝人無廟貌
于世界遂流沉于泉壤自蒙天譴便掌冥司伏審渤海高公令
君毀昏墳闕謫居冥府天賜佳城平生無戰伐之仇解后起誅
夷之釁得不撫銘而憤志託觚翰以伸懷伏希端公俯念無
依回垂有鑒時於萬難免此一杯倘全馬鬣之封敢忘龍頭之
庇

朱葆光

南陽朱葆光以朱全忠篡唐與唐舊臣顏蕘李燾教葦挈家南
渡寓潭州每正旦冬至必序立南岳廟南望號慟殆二十年

通腸米

唐末孫孺之亂斗米四十千金玉換易僅得撮合謂之通腸米
至于金玉換通腸米而不可得南楚新聞

如京使

梁改太倉使曰如京使取魯孫之庾如坻如京也

康王重瞳

梁朱全忠子友敬目重瞳

契丹辨玺

石晋出帝重貴降契丹德光上表獻玉璽金印契丹得璽以為製作非工與前史所傳者异命延煦等還報求真璽出帝以狀荅曰項王從珂自焚于洛陽玉璽不知所在疑已焚之先帝命受命命玉工製此璽在位諸臣皆知之乃已

孫郃

唐末左拾遺奉化孫郃遭朱温篡唐著春秋無賢人卜世論即脫冠服服布衣以終署書紀年悉用甲子

內黃

梁太祖幸河北至內黃問李珽曰何謂內黃珽曰河南有外黃下黃故此名內黃太祖曰外黃下黃何在珽曰秦有都尉理外黃其故墟在今雍丘下黃為高齊所廢在今陳留太祖平生不愛儒者聞珽語大喜

李崇礼

唐莊宗弟名崇礼封薛王值郭崇謙之亂匿名避難樂延安山

水留居焉結廬坑口罄囊金以賑貧乏病革出封語示人人始知其出處宋淳熙中鄉人祀之廟曰永慶

王審知

閩王王審知以五月五日死閩中以五月四日作節福州府志按五代史審知以十二月死非五月也

王審知墓在蓮花峯下宣德四年盜發獲金珠亡筭有司仍復修治

王延鈞母家

惠安縣南靈秀山閩王王延鈞母家在母黃姓審知聘其女為妃及延鈞僭號追崇曰后龍啟二年十一月癸丑延鈞來謁黃氏家廟次日曉起問黃家人曰夜來窓風剪之尾霜稜之地如斯時暫乎常乎有克宗者對曰茲地濱海遇秋之日如城郭之冬也延鈞乃命沿海居民屋瓦志得黏土泉屋黏瓦始自王延鈞

明王世懋閩部疏云漳泉間燒瓦皆黃色郡人以海風飛瓦奏請用筒瓦民居皆儼如黃屋蓋行部使者徒問之隸人與卒何

以得其土風故寔耶又江右鍾允復初登第夢作一縣縣中是
都是黃屋不知何祥也尋銓晉江令閩書

劉隱祖

劉隱祖安仁上蔡人也後徙閩中商賈南海因家焉父謙為廣
州牙將謙三子曰隱台龔知是故寓居而安也龔音儼敦仁有

復劉從効問龔詩伏羲初畫卦蒼氏乃製字點畫有偏傍陰陽
音協比古者不嫌名周人始稱諱始諱猶未酷後習轉多忌或
援他代易或變文迴避濫觴久滋蔓傷心日益熾孫休命子名

吳國尊王意羣尚憲弄僻齷且竅焚異梁後踵已非時亦迹舊
事顯統杰自其蜀閩是其二鄙哉仇詹名陋矣越艱義大唐
有天下武后擁神器私制迄無取右音寔相類乖胤回因星胤
恚厓丙塋在因及罌胤作史雜詳備唐祚值傾危劉龔懷僭偽
吁嗟毒蛟輩睥睨飛龍輩龔儼雖同音形体殊乖致廢學媿未
弘來問不棄奇字雜雄博摛文伏韓智因誦鄙所聞敢布諸
下吏

吳越改元

歐陽修作五代史謂吳越儀衛名稱多如天子惟不改元至著
十國世家云聞之故老亦嘗稱帝改元而事無可攷獨得其封
落星石為寶石山制書稱寶正六年辛卯耳按辛卯即唐明宗
長興二年又至正中海鹽古墓有志碑為吳越將許俊志稱寶
正二年又寶泰元年羅隱新城縣記癸未歲癸未乃唐宗元年
年以此見吳越之改元審矣董穀碧里雜存

宋時王順伯收臨安府古碑有尸屋崇化寺幢題天寶四年明
慶寺幢題天寶五里年九里松觀音尊勝幢題寶大二年水月寺

幢題寶正元年招賢寺幢題寶正二年小明慶金牛瑪瑙寺九
幢皆題寶正貢院橋柱題寶正六年至武肅王堯遺命去國儀
用藩鎮法臣事中國然則天寶寶大宝正三名皆僭號也田汝
成西湖志

吳越備史

吳越備史錢氏諱佐故以左為上凡官名左字者悉改為上此
書所謂上右者乃左右也陸游跋

錢武肅王諱石榴為金櫻茄子為落蘓

吳越貢道

吳越王錢氏貢中國由海上達登萊凡三千里

南唐程式

廬江伍喬承進士第一命勒喬程文於以為永式

南唐劉仁瞻像

宋王旒游金陵昇元寺見房壁有繪金紫大夫像上題詩曰陣前金牌生無媿鼓下蠻奴死餘羞三尺生綃暗塵土凜然霜鷲欲橫秋旒不能解捲画帟示其父平甫曰此劉仁瞻像表世弼

詩也漢隱叢話

孟賓

唐末孟賓詩那堪雨後更聞信絕重湖路十千憶昔故園楊柳岸全家送上渡頭船見王元之小畜集

胡嶠陷虜記

歐陽修五代史述同州郃陽令胡嶠為遼蕭翰翰掌書記隨入其國當周廣順二年亡歸道其所見云自幽州西北入居庸關明日又西北入石門關關路岨狹一夫可以當百此中國控扼

契丹之險也又三日至可汗州南望五臺山其峯最高者東臺也又三日至新武州西北行五十里有雞鳴山明日入永定關唐故關也又四日至歸化州又二日登天嶺四望冥然黃雲白草不可窮極同行者皆慟哭欲絕明日再行所見多奇異草木迂徐數月乃至榆關至儒州又皆漢地矣信嶠所云則教州往返程計甚多以今考之武州即為歸化儒州偏近可汗自古俱為百里不出二百里間而嶠云云蓋來自異域出奇談以誇示中國耳博洽如文忠顧輕信之耶夫周廣順去石敬瑭時頗近而汴都去居庸亦止二千餘里乃所傳聞固已如此况南宋去仁宗之時武夷去西陲之地視此更加繞繚無怪蔡沈書傳有鳥鼠山之誤也嗚呼中國之士一淪異域中國之人遂視為大宛于闐則凡胡元時海外必將狄我中國而我 聖祖重關乾坤之功誠萬世所當繹思云 宣府鎮志

喬亢陸軌

喬亢陸軌襄漢人仕周為殿侍東三班宋祖受禪自宣祐門入守者拒勿納乃自 門入既即位召宣祐門守者皆自殺太祖

大驚趨救之得不死者二人詢之乃喬陸也改班長人以青紅
二色帛為帽飾二人既出復自殺太祖義之命立祠祀之南渡
後立廟于杭州 杭州府志

宋初藏書

宋初無為軍一道士多書如唐人文集無不備又浮屠慧遠收
古人簡牘宋朝自開國至崇觀間凡各臣及高僧筆跡無不備
柴世宗二子

柴世宗二幼子宗太祖分賜功臣潘美尚書盧諤各子之俱冒

其姓 馮元成集

孟果男

蜀王孟昶降宋入朝舟過眉州灤渡一宮嬪有孕昶出之祝曰
若生男孟氏尚存後果生男

樊若水

南唐樊若水北走宋江南皆知獻南政策或請誅其母妻李其
煜不敢但羈至池州其後若水自陳母妻在江南朝廷命煜護
送厚遣之

王彥昇餒死

王彥昇字光烈蜀人徙居長安工擊劍為軍校以推戴太祖當受禪時太祖惡其專殺韓通止授原州都巡檢彥昇驚猛番夷或犯法人有不愜意者自搏其首齧食其耳然番夷震懼莫敢犯後餒死汴京

宋制

禁中處分事付外謂之內批又謂之御筆皆內夫人代筆而所謂御寶批者或上批或內夫人批皆用御寶惟親筆則上親書押字不必用寶宋制惟兩府得賜金帶佩魚謂之重金

宋科目惟進士及九經五經開元禮三史三禮傳學究明經明法諸歲舉為常然諸科賜第者後復應進士科則進士尤重也攷建隆初禮部設進士及諸科皆秋解冬進士承禮部春考試合格及士第者列名放榜于尚書省不第者仍候秋解凡進士試詩賦論各一首策五道論語十帖對春秋或禮記墨義十條凡九經帖書一百二十條對墨義六十條凡五經帖書八十條對墨義五十條凡三禮對墨義九十條凡三傳一百十條凡

開元禮凡三史各對三百條凡學究毛詩對墨義五十條論語
十條爾雅孝經各十條周易尚書各二十五條凡明法律令四
十條五經并用毛詩之制各間經引試通六為合格諸州以判
官試進士錄事參軍試諸科試諸科見任官錙鎖廳試所
屬先以名聞得旨 解凡就試惟詞賦者許帶切韻玉篇而稽
版籍察素行嚴互保連坐之法挾書口授有禁不稱恩師門生
則通諸科皆科先是將赴貢院臺閣近臣得荐所知名曰公荐
乾德初禁之覆試殿試省試試之八月皆始于開寶中殿試加
論一首而以題三為準榜分三甲皆始于太平興家間嘉祐二
年與殿試者始免斥落治平間始定三年一開科神宗始罷諸
科併于進士熙寧三年始頒經義式取士而殿試專策分五甲
焉後以凡貢於鄉而誦于禮部或廷試不錄者積舉教而參以
年臨軒日得別籍名以奏徑許附試謂之特奏名學校則內舍
生間歲一試補上舍上舍生積校已優舍試又入優等謂之兩
優釋褐中選者即命以京秩除學官元豐中元舍法上舍生得
免秋解重和元年始有武彘之科宣和中推行元豐舍法於諸

路於是縣有免解進士未幾南渡以後科目互為變更然其取人不過徑義論策詩賦而已紹熙元年又有宗子正奏附進士之選

張岳惠安縣志云余觀宋場屋士習之變攷其是非得失與國相盛衰自嘉祐至開寶士氣淳厚中間文体雖卑弱險恠然無敢為私學曲說以亂之治平熙寧以後乃有國是說倡於新法和于紹述蔓于和議而極于偽學學士有一言不合國是者則指以為怪妄斥逐禁錮無餘力于時薦進之士莫不翕然從之而宋之國事亦且變而南渡變而臣虜變而之閩之廣不可為矣推原其故士大夫爭私意其上學術不明人心蠹壞其禍乃至此極豈非後來永鑒耶

宋制賜進士第命中書行詞其書勅鄉貢進士姓某則南省第一人也

宋制大比之歲每州皆有貢院郡州士子皆得入試

留鎮賜第

宋初革五季之患召諸鎮節度會于京師賜第留之分命朝臣

出外列郡號權知軍州事軍謂兵州謂民也

曹彬殺鍾倩

曹彬為周太祖張貴妃從子世掌內戚其克南唐學士鍾倩朝服坐於家彬兵及門氣族无遺

改姓

陶穀原姓唐因避石晉諱而改真德秀原姓慎因避孝宗諱而改五雜俎

水灌太原

太祖攻北漢引汾水浸太原城水自城門入有積州自城中颺出塞之會暑雨軍士多疾乃班師王師已去繼元決城下水注之臺駘澤水已落而城多摧圮契丹使者韓知璠時在太原歎曰王師之引水決城也知其一而不知其二若知先浸而後涸則并人無類矣

土司世姓

楊延昭初名延朗延廣初名文廣以三世復有文廣故諱之今播州宣慰司楊氏之祖

開寶中宗景陽以軍功累官節度使平定西南夷詔就大萬谷
落開總管府夷人安之遂世爵其地歷十四世曰阿重始仕元
改順元等處軍民宣撫使開治于貴州又三世曰欽官至昭勇
大將軍順元等處都元帥 明初內附拜貴州宣慰司世焉

點記

定七夕

太宗太平興國二年七月詔七夕嘉會著於令甲今之習俗多
用六日非舊制也宜復用七日且名為七夕而用亦不知自何
時以然唐世無此說必出于五代耳 洪邁容齋三筆

戟門

建隆間始立戟稱戟門

鄉墨

唐宗明經帖書墨義許公呂夷簡應本州鄉墨舉試卷墨義十
餘條如云作者七人矣請以七人之名對則對云七人某也
謹對有云見有礼于其君者如孝子之養父母也請以下文對
則對云下文曰見無礼于其君者如鷹鷂之逐鳥雀也謹對有
云請以註疏對者則對云註疏云謹對有不能記憶者則只

云對未審其上則具考官批鑿如所對善則批一通字所對誤及未審者則批一不字見東陽呂氏家塾刊本

王禹偁與馮伉書

禹偁讀唐史見陸忠州之在相位也擯斥李吉甫不容于朝及有南賓之貶而吉甫方為刺史贊之門人故吏亦皆危之泊到貶所而吉甫待之頗厚有庶僚見宰相禮又贊皇公之秉鈞也排逐牛僧孺有循州之謫及德裕南遷竒章公量移在汝贊皇路由此郡而僧孺接之情禮甚至為道南方風土之宜殊不以向之嫌隙為意賢哉二君子之操心也如是豈古之所謂以德報怨者耶禹偁向以紫微郎兼廷尉事亦嘗議閣下之過今有商於之命而親友間往往相唁誠以閣下通理是郡也禹偁則獨以為不然且夫以怨報怨皆私事也故雖睚眦必報矣今禹偁於閣下議刑公事也閣下豈以為怨乎雖禹偁之名位才業望忠州贊皇也遠矣而閣下讀書為文立身行事豈不知吉甫僧孺之為人乎望閣下觀古人之行敦同年之契窮愁之中少假氣燄則遷客之幸也禹偁頓首

李煜被禍

李煜歸朝為左散騎常侍遷吉事中太宗一日問徐鉉曾見李煜否鉉對以臣安敢私見之上曰卿第往但言朕令卿往相見可矣鉉遂往望門下馬但一老卒守門徐求見卒言有旨不得與人接豈可見也鉉云我乃奉旨來見老卒往報徐入立庭下久之老卒遂入取舊椅子相對鉉遙望見謂卒曰但正衙一椅足矣頃間李主紗帽道服而出鉉方拜李主遂下階引其手上鉉力辭賓主之禮李主曰豈有此禮徐引椅少偏乃敢坐後主相持相笑既坐默不語忽長吁嘆曰當時悔殺了潘佑李平鉉既出有旨再拜詢後主何言鉉不敢隱遂有秦王賜牽飢藥之事又後主在賜第七夕命故妓作樂報聞于外太宗聞之大怒又傳小樓昨夜又東風及一江春水東流句併坐之遂被殞云

記殘經

南臺古刹有佛書教百卷多唐季五代時所書字畫精勁歷可喜按大藏經目凡五千四百卷今所存總十一卷尾可讀者

又無幾也阿含經四卷泰寧軍節度使齊克讓造正法華經一卷乾符六年女弟子牛鈔音書大涅槃經若經共三十卷武寧軍節度使宋友恭造友恭全忠養子李彥威也毗荼耶雜事一卷德妃伊氏造唐莊宗次妃後有印章曰燕國夫人伊氏蓋未進封時所制也其餘中斷橫裂虫蝕鼠齧雨敗塵腐無復完綴想夫飄散蹂藉炷灯拭案補壞帳帷塞屋漏者又不勝其數也

李昭玘

輕賦

吳越錢氏賦歛無藝兩浙罹害及宗除吳越三衢江漢臣為鎮海軍節度判官上十三州圖籍於有司謂仍其舊是厲其民無已也遂沉其籍于河坐是擯棄終身後命王方贄更定其賦畝稅一十民始聊生

異獸

太平興國九年嵐州獸一角似鹿無斑角端有肉性別右散騎常侍徐鉉等驗以為麟春秋曰麇身而有角者麟也春秋感精符曰麟一角者明海內同一主也

至和 年交趾獻麟如牛而大通身皆大鱗首有一角攷之記
傳與麟不類當時有謂之山犀者然犀不言有鱗詔欲謂之麟
則憲夷獠見欺不謂之麟則未有以質之止謂之異獸今以予
觀殆天祿也按漢靈帝中平三年鑄天祿蝦蟆於平津門外注
云天祿獸名今鄧州南陽縣北宗資碑旁兩獸鐫其膊一曰天
祿一曰辟邪其獸有角鬣大鱗如手掌南豐曾阜為南陽令題
宗資碑陰云二獸膊之所刻燭製作精乃七八尺鬣尾皆鱗甲
莫知何象而名此也今詳其形甚類交趾所獻異獸知其必天

祿也夢溪筆談

嘉祐三年六月丁卯交趾貢異獸二稱麒麟狀如牛身被肉甲
鼻角端有角食生芻藁必先以杖擊其角始牛食樞密使田况
辨其非麟詔止稱異獸司馬光有賦

楊繼業

宋將楊繼業出代州攻遼耶律邪軫擒之初繼業至狼牙村心
惡之欲避不可得既擒三日死

手畢

宋子京郊別紙多曰伏承手畢南人謂筆為畢因效之 王山谷

宦尼

宋初大臣家女多為尼如平章趙普女

右衛上將軍宋渥女開寶皇后妹也為比丘尼法名惠圓

制科

制科分五等虛一二等而以下三等取士終宋入一等五人吳育蘇轍范百祿蘇軾雖入三等而為考官所駁復降四等李廔四等

梁灝

梁灝太宗雍熙二年廷試第一真宗景德元年以翰林學士知開封府暴卒年四十二子固亦進士第一至直史館年三十一宋史俗傳梁灝年八十二登第謝啟悞 談遷曰龍溪縣志林大年字春卿年八十二以書義再領鄉荐謝啟有云減伏生之八歲加太公之二年後不赴南宮郡延為州學正年九十耄矣日與生徒討論未見書終老于湖山

王昭遠

阜城王昭遠微時里祀里神昭遠適至有以博酪授之謂曰汝他日當有節鉞試擲以下之昭遠一擲六齒皆赤後歷天雄軍都部署知府事贈太尉謚惠和

玉等子

宣和殿有玉等子以五色玉次第排定凡玉至則以等之鄱陽張世叔官游紀聞

鄉舉

鄉舉初無定制仁宗治平以後始三歲一行皆從本州發解應試婺州士子多而解額隘三歲止解七人崇寧頒三舍法于學歲解七人宣和五年復科舉三歲解十四人景定二年增解額十名預選者為鄉貢進士其在漕司應試者解額頗寬士人往往舍鄉貢而度漕牒得預選者為漕貢進士又太學三舍生遇科亦仍自發解預選者為國子進士此外復有隆興混試朱子曰今日倡為混補之說者多是溫福處婺之人而他州不與焉非獨婺州躁兢而他州廉退也勢使之然耳蓋言解額之不均也時又有該恩免解解而徑上禮部者然以上諸科赴禮部不

第則並為韋布而無斗祿之需 金華府志

古成之

廣州古成之居羅浮力學不倦登梁灝榜第二預聞之有張某
嫉居其上召飲成之密置啞藥酒中比旦臚唱呼不能應上怒
扶出或勸自明其事成之曰司命有定非人所能與也人服其
量

腹兄

翰林學士李宗諤送從表兄詩呼為腹兄見弇州集不知何所

據

呂蒙正土室

呂文穆微時於洛龍^陽之龍門利涉院土室中與溫仲舒讀書今

傳破窰祖此也

三至堂

陳堯佐三守廬州曰三至堂

楊洙淳化中守安慶天聖中子為通判元豐間孫希元又守
郡凡三至安慶

魏國太夫人陳氏龍圖閣直學士從易之女內翰蕪紳妻之而
丞相頌母也從易紳頌皆嘗守杭夫人三至杭却題却柱曰吾
從父至此中與吾夫偕來今同吾兒凡三閱江山之勝

天子門生

贛縣王奇游京師真宗偶見其所作詩召見賜第奇作詩不拜
春官為座主親逢天子作門生

同名丁謂

晉公丁謂當國惠安吳謂浩然文詞俊邁不肯避其名遂斥外
終屯田員外郎

葉武

邵武葉武子宏秘閣修撰善易學嘗曰易道莫大於時時有二
義有在外之時有在我之時士君子出處須論在我之時然後
論在外之時

冠準柘枝舞

寇萊公好柘枝舞會客必舞柘枝每舞必盡日時謂之柘枝顛
鳳翔有一老尼猶是萊公時柘枝伎云當時尚有數十遍今日

所舞柘枝比當時十不得二三老屋尚能歌其曲好事者往
傳之沈括

